



文莊集卷二十七

青詞

建隆觀青詞

為奉安內降昊天帝并五帝入殿慶讚

宋

夏竦

撰

伏以五帝御天素嚴於真像三秋協言爰即於靈祠仰
慶威光聿遵科教建清場而有翼陳法醮以惟馨虔佇
鑒觀誕垂福祉謹詞

荆南府紫府觀開啟皇帝本命青詞

伏念臣祇荷慶靈紹隆基業仰繫真蔭俯庇民區屬茲
元命之辰敢效祈恩之禮冀垂鑒佑介以福禧俾膺壽

考之祥永布希微之化無任懇禱之至謹詞

兗州會真宮等處為皇帝本命青詞

伏以時惟首夏逢本命於良辰恭按明科建清場於祕
宇仰祈真蔭誕降多祥億載近鴻願增於遐壽萬方富
庶永庇於懷生無任懇禱之至謹詞

兗州會真宮等處皇帝本命啓告玉皇青詞

伏念臣虔膺祕訓司牧中區式屬清辰叶於元命言瞻
靖館恭舉於明科對起層穹仰歸於精意敢期景祐永
集眇躬無任懇禱之至謹詞

兗州會真宮等處聖祖青詞

伏念臣欽承寶緒祇嗣慶基屬元命之清辰方翳於道
蔭瞻靈區之靖館敢薦於精誠仰祈燕翼之慈永錫隆
昌之佑保茲冲眇下庇蒼黔無任懇禱之至謹詞

兗州會真宮等處皇帝本命啓告三清青詞

伏念恭承道蔭俯庇民區時既戒於朱明日載臻於元
命敢舉列真之典式仰延三境之光靈冀開降鑿之恩
申錫函幃之福誕垂嘉應永佑眇躬無任懇禱之至

皇后為皇帝本命醮青詞

伏以少皞司方啟初秋之令序聖君無運屬本命之清
辰是敢祇舉明科恭陳法醮伏願皇帝博延真蔭茂合

天和金格陞名永保長生之道瑤圖積慶誕膺申錫之
祥允整精誠仰祈冲鑒

鳳翔太平宮玉皇靖詞

伏念臣祇荷慶靈紹隆景命式屬清和之候實當生育
之辰敢助真祠仰陳馨薦伏冀玉虛降鑒飴御下臨永
錫祺祥佑茲冲眇無任懇禱之至謹詞

鳳翔太平宮三清青詞

伏念祇奉駿命虔嗣丕基惟茲首夏之辰式屬誕生之
日敢依靖館恭薦令儀方冀靈心久孚貞蔭俾遐膺於
壽考庶永庇於華夷無任懇禱之至謹詞

杭州天桂山大滌洞霄宮玉皇青詞

伏以季夏戒辰元符紀節虔依妙教恭啟清場仰冀鑒
觀誕昭况施降多祥於溥率襲嘉慶於眇冲永洽真風
式彰丕應無任懇到之至謹詞

在京諸宮觀開啓下元節青詞

伏以水官布度紀節于上冬靖館崇真祈恩于法醮敢
冀降鑒之德益隆丕冒之祥企萬壽於渺躬襲太和于
品彙永康縣宙允迪靈猷謹詞

玉清昭應宮長生崇壽殿開啓下元節青詞

伏以良月就盈式當于令序真祠集福祇率于明科仰

繫顧謨之思申錫延鴻之慶永康景業對越靈心謹詞

在京諸宮觀開啟降靈節道場青詞

伏以玉燭均和肇宣於寒律景輿昭格式紀於良辰敢
祇建於清場用仰祈於真貺冀靈之鑒祐錫繫祉以厯
鴻永蠲對越之誠仰謝顧懷之德謹詞

真遊殿玉皇降聖節青詞

伏以顛項司方塵鍾紀律當先帝上封之日是颺遊降
格之辰即內殿之疑嚴建清場之肅穆冀景輿之臨暨
垂介福以來同錫萬壽於眇冲薦百祥於宗社永洽和
平之治式昭眷顧之靈謹詞

玉清昭應宮明慶殿天祺節青詞

伏以颺游昭格嚴廣殿以宗真寶錄薦臻協靈辰而
紀節謹依科式恭啟壇場伏冀六羽降盈九清垂蔭宗
祊熙盛茂擁於多祥億兆歡康永宜於至治無任懇禱
之至謹詞

真遊殿開啟天祺節青詞

伏以颺駁降臨載嚴於祕殿珍符申錫式遇於良辰敢
展窠於壇場用歸誠於霄極冀臣民之有幸錫福祉以
無疆永保鴻鈞寶繁靈貺無任懇禱之至謹詞

祥源觀皇太后為皇帝乾元節青詞

伏以首夏冲和屬嗣君之誕日殊庭蠲潔啟靈寶之真
場仰冀鑒觀聿隆右序願享延鴻之筭益因於丕圖庶
宣清淨之風永康於率土

真遊殿聖祖青詞

伏念臣幸膺真蔭祇嗣丕圖式當生育之期敢罄齊明
之懇虔依秘宇恭啟於清壇仰圻颺輪載陳於法醮願
綏福祉永佑眇冲

三青青詞

伏念臣獲奉寶圖紹膺景命爰屬誕彌之月式陳昭事
之儀伏冀三境降監百靈孚佑永綏冲眇克降壽考之

祥仰報慶靈敢忘齋明之禮

玉皇青詞

伏念臣虔膺駿命祇嗣丕圖維茲首夏之辰實屬誕生
之月敢恭遵於科式用仰達於誠明伏冀宇宙鑒觀颺
游降格俯銘靈貺永佑眇躬

東嶽青詞

洪惟有帝宅彼岱宗主陰陽之司溥臨於下土祀降生之
日式屬於季春敢恭舉於明科用仰伸於昭事永繫
鑒佑申錫祺祥無任懇禱之至謹詞

會靈觀五殿各開啟道場為民祈福青詞

伏以峻極尊方實司於陰陽清和布序式屬於正陽敢
展寀於壇場願降康於縣宇俾羣生之共泰表美應之
薦彭獲賴神依永嚴馨薦無任懇禱之至謹詞

會靈觀凝祥池崇禧殿道場青詞

伏以仰尊維嶽並建於真祠旁湛靈淵中嚴於秘宇屬
茲首夏式啟清壇永祈申錫之祥遍福懷生之品俾躋
富壽庶洽歡康無任懇禱之至謹詞

襄州會真宮道場保護邦國為民祈福青詞

伏以東岱司春式屬發生之候殊庭集福素嚴睟穆之
容敢祇啟於靈壇用仰祈於道蔭伏冀九清孚佑彌錫

於邦家六氣鈞和永隆於民庶無任懇禱之至謹詞

簡穆皇后青詞

上世開基大雅播姜任之德奉先薦祉真乘宗釋梵之
宗伏惟簡穆皇后詔範坤儀騰芳仙籙堯門啟聖繼天
之祚無疆閔苑登真配帝之靈如在今皇帝功高繼志
孝極因心昭事闕宮備物既伸于常祀永懷慈景茲辰
更奉於良因陳淨供於寶階敷妙音於海藏聿申精義
仰薦神游簡穆皇后伏願由文母之尊崇證法正之自
在百千相好圓成十號之身億萬斯年永佑重熙之運
今皇帝伏願二儀顧諟象聖護持河洛凝祥早膺於瑞

籙靈椿比壽大庇于中區然後願藩屏懿親益著盤維
之德鈞樞近輔更隆柱石之勲珠躔順軌于九霄玉燭
均和于四序萬彙率服咸歸舞羽之仁多稼順成克叶
斯箱之頌

昭憲皇帝青詞

伏以厥初生民仰徽音之如在聿追來孝屬諱日之爰
臨恭憑最上之秉式薦無邊之福昭憲皇后倪天表慶
履帝凝祥顯著厥靈文武之功並起肇基大業姜任之
德尤尊今皇帝祇紹丕圖永懷慈景黃彝進裸聿嚴清
廟之儀法雨飄花特啟紺園之會昭憲皇后伏願乘茲

勝果超彼真階

孝明皇后青詞

伏以彤史垂芳聿懷於慈景紫闈徹樂式屬於諱辰恭
憑最上之真乘仰薦無邊之妙果孝明皇后凝祥沙麓
表德素舒仰瞻清廟之靈方遠鈞天之馭今皇帝禮崇
追養孝極因心夙啟祇園恭修梵會陳寶階之淨供演
法海之潮音孝明皇后伏願花界棲神鷲山悟法享諸
天之妙樂佑億世之丕基皇帝伏願諸佛護持萬靈薦
祉永保後天之壽長為諸夏之尊然後藩屏懿親協宣
于忠力鈞樞近輔共贊于昌朝凡居率土之濱共洽梵

天之福

熙陵開啓忌辰青詞

恭以太宗削平中夏濟世之功至大賓天之駕難留敢
當撤樂之辰虔即因山之域載嚴象設祇啟壇場伏惟
三境鑒觀百靈拱衛恭伏希微之教仰資汗漫之游申
錫美祥永昌嗣業無任懇禱之至謹詞

醮文

太祖皇帝殿醮文

皇帝仰遵先志深惻庶民昨以離畢愆期食若興軫仰
禱克開之烈果應大有之祥雨均十月之期穀倍萬箱

之獲歧行永息協氣咸充爰卜靈辰恭趨祕宇親奉馨
香之薦聿伸報謝之誠伏願基緒遐昌珍祺沓委四時
合序常登豐茂之期萬壽無疆永享延洪之祚

寶符閣醮文

皇帝某祗席洪圖恭臨率土昨以三時在務百騰潛生
欲傷南畝之苗未降西郊之雨精心載禱悉殫於行跋
膏澤載零遂豐於多稼是消吉且祇款層楹躬燔鵲尾
之香用答鳳軒之佑伏願萬靈禔福六氣均和大槩盈
車嘗薦有年之瑞亦文候日更膺疇德之符

天慶節醮文

右伏以河出圖洛出書聖人則之象天命也故祀於官
則雲名鳥氏籍於典則八卦九疇歌於詩則寶鼎芝房
紀於年則黃龍甘露豈若我尊號皇帝陛下即位之十
一載重熙累盛際地接天正月肇春望舒哉魄受帝文
於象魏成茂典於天孫爰紀靈辰標為慶節峙清壇於
萬宇報繁祉於百靈召青瑊而命素威禮蒼龍而祀
金虎恭願玄元敷佑上帝降祥永壽考於南山固本支於磐
石以致騰貢服皂鑿耳梯山吐溥曜於絕垠飛景炎於
徃號巍巍蕩蕩子子孫孫某無任祈天禱聖

修洪州廳畢設醮文

伏念臣叨領藩條獲居郡屏顧惟廳廡積有歲時棟宇
墮頽基坳卑陋懼有傾壓爰用繕修既鳩僦於工徒慮
震驚於防禁是敢虔修科醮仰謝靈祇伏冀大道延慈
百神垂佑軍民歡泰藩府謐寧風俗還淳嘗空於庶獄
陰陽順序永錫於康年誕集多祥副茲精志無任懇禱
之至謹至

設醮文

伏念某本以微生竊依真教虔遵善道仰對靈心然而
任歷藩經職司厨傳網條所限須用威刑使驛繼來難
停烹宰今又念業塵久積心境未澄懼有愆尤仰違慈

儉是敢虔修清醮自露丹心依首過之明科瀝求哀之
深懇伏願三清降鑒衆聖垂慈除赦前非布昭後福星
辰運動永銷臨照之災天地保和常錫安寧之佑誓將
勵節仰謝洪恩

夏醮文

伏念臣欽膺寶命大庇縣區念溥濟於羣生每增勤於
旰食惟仰繫於道蔭用茂合於天和屬茲隆暑之辰敢
薦折恩之禮冀九清之孚佑俾百福之來同保以康寧
四序常均於善氣錫之壽考萬年永遂於多歡載罄精
衷仰承嘉應

祝文

明慶殿謝雨祝文

皇帝祇嗣慶基恫矜庶彙昨以農時在務膏澤未零仰
罄齋明聿伸祠禱驕陽盡弭羽孽爰銷亟成豐茂之祥
大洽冲和之氣是涓良日躬款殊庭虔奏飛香仰疇真
蔭皇帝伏願璿源益濬壽嶽彌高祉福紛綸更茂隆昌
之慶蒼黔安泰永臻富庶之期

祈晴祝文

維天聖四年歲次丙寅六月乙卯朔二十日甲午嗣皇
帝臣謹遣推忠協謀同德佐理功臣樞密使武寧軍節

度管内觀察處置等使開府儀同三司守司空檢校太師兼侍中充景靈使兼羣牧制置使行徐出_州大都督府長史上柱國魯國公臣曹利用謹上啟聖祖上靈高道九天司命保生天尊大帝伏以方回溽暑肇戒青商大田垂豐楙之期積雨有滯滂之懼此修馨薦虔冀靈休精誠溥伸感應如響

紫微殿祝謝文

皇帝寅威寶命率育懷生昨以膏澤愆時飛螟暴稼精衷既禱果蠹疾之咸消嘉雨頻霑豐穰之倍異是用載嚴法御祇款清都親薦馨香恭酬况施伏願靈心鑒

佑道蔭延鴻拂石為期遐增於睿笑夢魚獻非常遂於有年

東樞相公宅上梁祝文

昨因私第密邇太宮冒瀆凝嚴願從遷易荷聖明之從欲頌爽塏以定居既繚牆垣式分柱礎載涓吉日用架脩梁敢薦明馨仰祈祉福伏冀門庭慶樂胷緒蕃昌永洽天和並繫神造伏惟尚饗

設供文

伏以敷揚正法早降外護之緣饒益羣生敢仗大慈之力竊念臣虔膺景命同牧中區每翳微妙之因允洽和

平之治近茲郡縣繼產螟螣既害及於蒼黔遂力行於
翦穢事非獲已須至於傷生理既可哀是修於勝利捨
茲服用備此香華奉具足之金容啟莊嚴之寶刹天階
陳供祇薦於馨香海藏流音宏宣於秘密一則以福茲蠢
動虔傾悔謝之誠一則以救彼沈淪俾脫昆蟲之報
伏願慈雲布潤慧日凝暉迴自在之悲心遂無邊之善
利

疏文

承天節祝聖道場疏

右伏以降聖丹陵標祥乙日南山比固六官歌天保之

章千歲為期九服有華封之請禎符景緯喜洽要荒恭
惟尊號陛下天表龍犀廟傳龜鼎辭軒四國頌瑞九房
薦玉帛於岱郊受圖書於河洛當里社效靈之日是幅
員稱慶之時臣獲總魚符叨馮熊軾貢庭實而特先禹
會稱兕觥而尚遠堯階敢舉彝章恭依象法大啓蓮花
之界廣宣貝葉之文妙音充滿於虛空法雨霑濡於德
萬勝因周徧皇覺證明伏願我皇帝陛下德茂圓方功
崇夏子本枝百世超磐石於漢家壽考萬年邁冥靈於
楚國干戈不試枹鼓稀鳴諸戎款服於三邊多稼穡生
於萬井民歌畫一士賦登三鴻徽濟美於祖宗茂實流

芳於方策凡居率土咸切傾心

進功德疏

妾伏以朝真景毫効駕清畿九成之樂載陳三獻之儀
允備妾限居宮掖莫奉粢盛仰依大覺之慈恭慶垂鴻
之典願三靈之宅粹永萬壽以宣和祝頌增虔倍百常
品

文莊集卷二十八

宋夏竦撰

祭文

中書祭故太尉尚書令王文貞公文

炎正宣精昴靈儲粹載降英賢允懷明懿心有常照材
無定器沉寂內融矜嚴外賁潤色暮訓藻麗詞豐周旋
樞近識茂言忠爰裨衮職克亮天功疇咨熙載若時登
庸慮善興謀協中布畫靡卹人言務均王澤內靖九流
外清四貉畫像雲臺鏤勳冊冊羅圖錫祉颺御延禧梁
陰讓德雕壤奉祇朝元景毫薦號真祠交闕祕藏首贊

鴻儀懿彼嘉猷邁茲亨會曠古難偕前良罕對異寵雲
游隆恩澤霈禮絕地尊功高貴倍封踰萬室位冠三階
憂民瘁志體國勞懷辭榮中鉉進秩東臺叩闕斯切出
紵終回滄陟上公靖顯司館霜露增憂龍蛇起歎玉塵
停揮瑤琴罷玩疹積膏育身悲夢幻青霞難挹瓊藥無
徵太醫連袂中使盈庭載紆詔蹕深惻皇情抱紳猶對
逝水俄傾痛極殲良哀深撫几制服推恩易名進美宅
兆將安塗芻既備衢巷輟春都城罷市某等早陪伊鼎
獲奉蕭規情條共慘高恒方墮排徊素館傾慕容衣恭
陳宿奠永隔清徽

行狀

故金紫光祿大夫行尚書工部侍郎致仕上柱
國彭城郡開國侯食邑一千三百戶食實封四
百戶贈刑部侍郎朱公行狀

曾祖起皇唐大理司直

祖泌皇唐夏州安撫判官檢校比部員外郎

父葆光皇唐江陵府當陽縣尉累贈戶部郎中

潭州衡山縣紫蓋鄉雲峯朱昂字舉之年八

十三

公世京兆漢陂人唐天復末烈考避地穰中梁太祖革

命與唐舊臣顏充李濤等數千家南趨衡嶽^嶽下每冬至
歲旦必序立于南嶽司天祠前北望號慟日月昏曠天
地悽慘殆二十年淪喪垂盡唯李濤一族北歸公以家
世儒業與進士熊若谷鄧洵美力學有朱遵度好讀書
人謂之大萬卷謂公為小萬卷時中國多故四方幅裂
躬侍老母急於祿養嘗與友婿張暉間行路出廬陵過
道士謂之曰非久中原當有真主混一天下公仕至四
品安用南為遂北遊江淮遇周世宗南征招討使韓公
令坤至揚州公杖策軍門告以治亂方畧韓公器之使
知永真縣事兵革之際逋逃過半公便宜綏輯歸者七

千餘家韓公表授永真令秩滿南歸太祖皇帝即位故
相國李公昉以給事中出使湖外物色異人公與東平
呂夔入謁傳舍李公延見甚喜尤加賞識謨南征錄云
朱呂二君甚可語道洎李公就知衡州奏公為錄事參
軍秩滿調授襄州宜城令尋除太子洗馬知蓬州又就
知廣安軍時渠州妖賊李仙聚眾踰萬劫掠軍界公設
策擒之果台渝涪四州之民連結為妖者一切不問實
人遂安時宰相薛公居正謂公有斷而識體遷殿中丞
知泗州太宗嗣位江表初平李氏銜璧吳越獻地使駟
係道舟車蠶午共億餉饋倉卒畢給聚淮濱流屍三千

為家瘞之有戍卒謀亂公止誅首惡悉貸枝黨人感其
惠淮南歲漕米三百萬石公督其程運左右漕事朝議
美之就遷監察御史充江南轉運副使職滿知鄂州未
幾加殿中侍御史充峽路轉運副使就遷庫部員外郎
充轉運使受代歸闕太宗問以夔峽邊事敷奏稱旨命
直祕閣面賜金紫時年六十有五在職二年以衰老求
郡出知復州宰相李公昉洎文館近職皆以詩送行到
郡暮歲上表乞致仕不允次年郊祀改元至道遷水部
郎中復乞致仕太宗謂宰臣朕知此人可召赴闕既至
再命直祕閣又二年兼越王府記室公雅正好禮王甚
憚之真宗即大位越王封雍王公亦改雍府記室明年
遷司封郎中知制誥兼判史館時上以館閣舊書編簡
散墜命公同內臣皇城使勝州刺史劉承珪與判昭文
館集賢院完緝殘缺區分部類事畢上其目加吏部郎
中職如故明年以本官充翰林學士周歲公年七十七
矣歎曰少值亂離老遇清世被知獎顧邈疇列草枯木
朽其將柰何遂抗表請老便殿召對敷諭再三志不可
奪乃授工部侍郎致仕翌日命閤門祇候內殿崇班張
士宗就第賜器幣舊制致仕官授訖放朝謝今刑部尚
書薛公映時知制誥上特命映就公第召對從容獻納

漏下數刻將退復曰卿間居多暇無忘公家或有章疏可附遞以聞又問以歸老之地公奏以嘗從事江陵有敝廬可以自蔽翌日命賜全俸公懇讓數四方允其請勅荆南官吏曰朕以朱昂素有儒學方居內庭拜章退身其志不奪授貳卿之秩表尚齒之恩斯為賢臣實可嘉獎仰本府候朱昂到日常切存問有表章附遞以聞仍詔公候秋涼戒路發日命兩制丞即三館臣寮祖道於南薰門中使賜宴於玉津園冠蓋盈路供帳甚隆榮動中外光震都國明年開封府秋試進士遂以玉津園宴送朱翰林歸渚宮為詩題為時所貴尚如此舊相張

公齊賢洎諸近臣有詩五十三章禮部尚書知開封府

溫公仲舒有長韻詩一章和者一十三人朝野榮之公

始至家病瘡復有詔撫問之曰卿閣筆鼈禁挂車渚宮

言歸當隆暑之時行邁有長途之役諒因勞止暫染微

疴況卿自樂高年素知善攝宜加頤養以就痊平眷顧

之懷寢興無已疾愈但閉戶靜居不交塵雜專以讀書

養素為樂深達釋老之旨自稱退叟所居東偏有官隙

地數畝詔以賜公遂建二亭一曰知止一曰幽棲有仲

弟協時為主客郎中佩服金紫以書招之協亦請老來

歸時人榮之比漢二疏數年著資理論三卷凡六篇上

之論時政賞罰得失及言天下至廣尤須賢才以為治
具若限以常牒則英雋之士沈於下位上嘉之降詔獎
諭曰卿文學俱優踐歷斯久竭節已彰於功行退身自
保於安寧猶勤愛戴之心以備討論之典頗資理道深
體絕誠勉順休和宜知頤養其書仍付史館同州觀察
使李公士衡為荆湖北路轉運使以公所得卿相餞行
詩刻石於承天院今龍圖給事中陳堯咨守荆南日視
揭榜以公所居里為東西致仕坊景德四年公豫撰墓
誌月而不日以季夏二十三日捐館朝廷哀悼賻帛百
匹錢十萬米酒麩有差賜孫适同學究出身非常典也

門人私謚靖裕先生禮也先有廖圖者與弟凝姪融居
南嶽皆工詩有名于代世有家法公娶圖女封姑臧郡
君至次子正辭之升朝也贈太原郡太君公贈刑部侍
郎公善誨子弟博貫儒術男五人長正彞進士及第仕
至光祿寺丞次正基今為殿中丞同判彭州次正紀今
為潭州湘鄉令次正用今為左侍禁知欽州次正辭年
十九進士及第今為太常博士江南西路提點刑獄勸
農使賜緋魚袋姪頓進士及第今為司封員外郎知隨
州正旬進士及第終江陵府監利縣主簿正臣進士及
第仕至太常博士三司戶部判官諸孫用蔭見任殿中

丞縣令主簿者五人女二人長適故左正言直史館兼
直秘閣夏侯嘉正次適今尚書右丞集賢院學士馮公
亮其積德至盛有如此者公操履方重志節清白歷官
四紀家無餘財淡於榮進深恥流競為太子洗馬十有
五年未嘗屑意在禁林非公事不至兩府所得之物取
三之一散購奇書躬自補綴是正文字及其退居有書
萬卷太宗皇帝之在位也製九絃琴七絃阮多士獻頌
第公首下詔褒美真宗皇帝初授徽冊公奉制撰文辭
體深厚尤為大筆其餘述作甚多常鍾愛今太博以為
紹我家事者此子公沒後太博歷官皆有能聲孜孜為
學編次公平生所著為三十卷今相國司空太原公序
引冠篇見鏤版行於世夫級冕在躬飾表所以招累公
歷事三朝訖無玷毀其清慎者也血氣既衰入朝所以
忘返公懇辭近職甘於退伏其高尚者也死生之變智
者休焉公豫決大期順物之化其達生者也家庭之訓
昔人難之公躬導諸子厥後甚大其善教者也舉是四
節足為名臣恭叙遺芳敢告太史謹狀

贈太師中書令冀國王公行狀

公之先周正子晉之後世家太原唐末高祖諱遵隨曾
祖冀公倅江西廉幕始占籍新喻祖鄭公生而警悟三

歲冀公教誦書日數百言七歲遂熟五經為吳順義初
賜童子及第弱冠為唐調為授本縣尉屢宰劇邑陰布
德惠專以寬刑利物為意諸郡累表為戎佐仕至常州
都團練判官檢校水部郎中通判軍州事歸朝終于濠
州團練判官父晉公幼有志節刻誦墳典江南明經登
科選限未選復舉五經與故龍圖閣學士刑部侍郎杜
公鎬同榜擢第特授本縣尉治有風迹秩滿而終初晉
公侍鄭公任鄂州通判日秦國夫人有娠就蓐之旦江
水暴溢將壞解舍亟遷于黃鶴樓既夕生公或言漢陽
居人遙望樓際若有氣象公幼而秀異資性機敏六歲

丁秦國夫人之喪十二鍾晉公之戚哀瘠以禮有如成
人初秦國夫人疾啟鄭公曰此兒生時頗有異將大王
氏門戶願愛之鄭公視如子保育于魯國夫人教于家
庭不就外傳涉獵書傳詞筆早成鄭公之在冀幕也公
甫十八太宗皇帝弔伐大鹵譔平晉賦論獻于行在而
還鄭公益奇之待以賓禮鄭公移濠梁公應進士舉將
拔覃懷解鄭公三止之曰吾年七十有三恐不逮汝之
返也公既行踰時鄭公忽一夕沐浴易衣會家人置酒
夜分疏記後事且曰吾歷官五十餘載慎刑罰活人多
矣後有興者其在吾孫乎遽捨筆就枕而薨府中聞樂

聲冷然公淳化三年第十一人擢第釋褐試祕書省校書郎亳州防禦推官勵精吏職屬朝廷遣著作佐郎直史館會會中使李知信察近郡風俗吏民狀公政迹會等上之有詔褒諭就遷防禦判官加文散十階尚書屯田員外郎舒公為公藝文可稱溫裕有素特改祕書郎司市征于肥上真宗即位就遷太常丞時大統初集急于用人詔近臣舉轉運使副三司判官給事中喬公維岳首以公應詔召赴闕主判三司憑由理欠司賜五品服公抗疏請盡蠲宿逋用廣寬惠辭甚詳切上嘉納之未幾命宰府召試孝為德本頌授右正言知制誥歷判

大理寺審刑院賜服金紫三年權知貢舉召入翰林為學士時蜀寇始翦反仄未安朝廷切于綏集以公充西川安撫使寬宥枝黨蠲去逋租驛奏便宜大愜上旨趣遣使召還授左諫議大夫參知政事明年郊祀加給事中景德中契丹寇北鄙駕將幸澶淵特加工部侍郎判天雄軍兼兵馬都總管並參豫如故敵騎引退王師凱旋公以台席不協懇退時柄遷刑部侍郎上特置資政殿學士員以處之有司定議班在翰林學士之下尋充南郊鹵簿使禮訖撰鹵簿訖上之改兵部侍郎充資政殿大學士位在翰林承旨之上尋知承進銀臺司兼門

下封駁三年遷尚書左丞知樞密院事修國史明年瑞
命集於東闕改元大中祥符泰山父老請紀云岱公首
建大議將明上志遂以公充封禪制置禮儀使兼判充
州禮畢加禮部尚書受詔撰社首壇頌加戶部尚書從
祀睢丘加吏部尚書並掌機密明年加檢校太傅充樞
密使同中書門下平章事有詔仍帶天官之秩九皇降
格加檢校太尉七年罷樞要以吏部尚書奉朝請再典
銀臺之務未幾復拜樞密使如故九年典校道書畢加
檢校太師尋兼羣牧制置使明年改元天禧上玉皇寶
冊禮畢加右僕射尋兼判禮儀院充會靈觀使亟遷左
僕射兼中書侍郎平章事監修國史明年充景靈宮使
都總管判祥源觀事三年授太子太保判杭州歲餘召
還復為資政殿大學士加司空尋制授山南道節度使
檢校太師中書門下平章事判河南府與疾遷第除司
農卿分司南郡今上即位改秘書監分司如故旋起授
太常卿知濠州遷刑部尚書知江寧府天聖元年九月
詔還制授司空門下侍郎平章事充玉清昭應宮使昭
文館大學士監修國史真宗寶錄畢加司徒二年郊祀
封冀國公三年冬十月兼譯經使赴上于傳法院歸第
感疾請告踰月詔使國醫相望于道十一月丙午聖駕

臨問賜白金五千兩戊申薨于東京永定坊第之正寢
遺命歸葬濠梁從祖塋也翌日皇太后車駕臨哭出涕
制贈太師中書令輟朝三日遣起居郎直史館修起居
注李仲容攝鴻臚卿護喪內待省都知雅州防禦使韓
守英副之官給經費十二月乙卯上內殿成服哀榮之
禮近世無比公五子並先公而亡次子從益仕至贊善
大夫第三子慶之終于衛尉寺丞追賜進士及第女二
人長早亡次適大理評事張瓌故參知政事洎之嫡孫
也孫女一人適太子中舍陳執禮故尚書左丞恕之子
也外孫女一人男一人並幼遺奏之上嗣男將作監丞

寅亮詔授大理寺丞諸父比部員外郎判尚書刑部司
農寺仲微素負吏幹累更事任特授司勳員外郎餘戚
屬授官者九親信錄用者十五人夫人李氏世本名宗
允懷淑德累封崇國夫人公嘗言往歲曾行圃田宿村
舍夜起視天中有赤文成紫微二大字光耀奪目使蜀
還褒城路中遇異人視刺字乃唐相裴度晉公告公以
默定之語而陰公之貴也遂留心羽化之事凝神雲漢
之表多用道家科儀建壇場以禮神朱篆紫微二字陳
于醮所以餘俸脩晉公祠于圃田自撰文書石以紀其
事永定在御真蔭方隆謁款神靈對越天地尊尚道德

布宣符瑞創圖訪對多自于公注意沃心無與為比若
乃頌祇肱壤奠壁瀨鄉抃恭謝之壇增耀魄之號公皆
為禮儀使法駕之展盛容也奉寶文以先道公繼為天
書禮儀副使同天書儀衛使路寢之尊景命也披帝籙
以肇宣公為讀天書禮儀使良金之範真儀也公為迎
奉聖像禮儀使溫玉之勒乾之也公為天書同刻玉使
前後所賜手詔璽書無慮二百函奉和御製及御和賜
所進歌詩僅三百餘首初罷參庶務備問內殿特賜宸
章辭極褒賁西鎮洛師南撫澗水皆有睿作寵行榮冠
時事超千古逢辰之盛理絕名言尤善筆劄勢甚峭

勁自成一家老而益壯好奕碁以自娛嘗奉詔撰集翊
聖保德真君傳三卷先天紀三十卷五嶽廣聞一百卷
與諸賢同撰集冊府元龜一千卷彤管懿範二百卷又
奉詔撰僖祖太祖太宗謚冊今上徽號冊文汾陰朝覲
壇頌西京應天禪院大原資聖禪院碑銘天書祥符贊
彤管儀範序廣孝泉崇真橋記丹耕封東平公贊皆為
大筆或藏祕館或行於世公出入兩府時將二紀敏于
見事詳于敷奏智術過人慎勤無及朝廷大議帷幄潛
慮或造膝以言或密封先達詭詞焚藁世莫得聞其茂
功懿績藏在盟府景行嘉猷播諸物聽謹次官闕敢告

良史謹狀

墓誌銘

故金紫光祿大夫檢校禮部尚書右神武衛大將軍致仕使持節康州諸軍事康州刺史充本州團練使上柱國開國伯食邑七百戶贈鎮南軍節度使太原王公墓誌銘

夫天人之際疇德以交神明之後因聖斯啟故在漢則太一下降著畫法於壽宮在唐則氣祖有言告鴻緒於仙李帝祚炎宋真蔭在天挺生異人潛達靈命清徽既往故可得而紀焉公諱中正字平叔本名捷汀州長汀

縣人也其先緱嶺疏源將兵者三代太原辨族世祿者四方累紫重金寶繁於京洛分枝辨葉或播於甌閩禮讓傳家鄉閭觀法至公會祖安卷道懷寶洒落塵迹與物無累越世自高迺後李氏據有江表急於聚兵王父靖以州里之豪屈致戎校偽置百里指揮使烈考成以事繼烈軍始終於偽置宣猛指揮使累贈左屯衛將軍然皆命不逢辰職非所好綽有繁祉茂啟後昆公資氣淑均秉性淳質幼失怙恃旁無周親逮於成人勉率賈用雜良以苦既不忍為欲羸惡囂終非其樂以咸平初祀懿星子故墟偶會羽人竇姓趙氏一見如舊巨測於

靈契信宿後別徵有於緒言迫及其冬再遇茅嶺長房
奉酒雖未入於壺中君賢負笈遂同遊於江介繼市鉛
汞對成白金乃訪竒草於瀝陽辨靈液於廬岫五圖金
紀授以采掇之名九井玉橫傳以合和之要仍別付靈
方環劔緘滕之書戒曰非遇人君慎勿輕述寶誨方畢
煙駕俄隱公乃累詣京室求見無階還過上饒佯狂自
異坐抵常禁謫戍嶺南艱危之中顛沛之際保護所授
不敢少懈未幾靈游荐至慰其憂虞復取神劔緘書且
云當候異日時供奉官閣門祇候謝德權適總巡兵頗
聞異迹及公私還較下置對有司德權時方在朝奏請

免釋迺禮之私第鍊成藥銀上獻帝宸遂解軍籍德權
樂公之道欵待累年制伏之珍盡昇而無吝秘授之事
萬計而不言一夕潛歸追反於路靈既幽啟睿聽有聞
始命景福使新州觀察勾當皇城司劉承珪案問之缺
甚隱惟堅請於面陳物色可知固潛與於心會承珪因
為改名中正俾詣登聞始得召見於龍圖閣下雲井之
瑞備對於綺窓栢寢之言悉驗於金刻乃授許州散掾
留止京師多與道人偶語於市承珪詰之乃曰即授法
聖師也王君既來遂容於請見金母將至亦有於傳言
遂以景德四年降皇城司解舍紗厨中戴冠佩劔服皆

青色玉文雲襖雖亞虛皇之尊紫羽華衣迥異上御之
貴時承珪新堂方構靈御頰格金童列侍咸佩於印章
天官時來若校於名籍承珪竊聆旅語始知乃司命真
君焉國家每欲究皇儀展帝容受乾文襲黃瑞公皆密
致真誨有開必先所以薦玉欽柴祥兆咸報超圖溢牒
見象日昭洎夫登岱勒封昭姓紀氏刻日千里之外時
無纖塵陟降萬仞之上安若平地非元真幽贊百神奉
塗則孰預於此粵以大中祥符三年加上聖號日九天
司命天尊擢授公銀青光祿大夫神武軍將軍致仕乃
給全奉環列為重方比於鉤陳奉身甚高彌富於天爵

四年春薤牲牲雉上薦禮存皇金輝發於大河偉兆騰於
冀壤烏奕嘉應覺悟蒸黎乃授公本衛大將軍領高州
刺史賜勳上柱國加金紫光祿大夫階五年冬宮籥既
嚴夜漏將半彤霞采霧上屬慶霄芝蓋雲裝下臨祕殿
繚繚聖胄長發其祥翼翼帝心聿懷多福迺奉上號聖
祖上靈高道九天司命保生天尊大帝賜公爵平晉縣
開國男食邑四百戶七年春仁里肇禋嘉檀大報徽冊
登陞而密雪罷零法駕在郊而烈威遽息肸蠶之際昭
報甚明迺進公爵開國伯增邑三百戶俄以本官檢校
禮部尚書領本州刺史兼御史大夫會稽未還嘗承衣

繡也問遼東遠別甚慰華來之思八年以分刺之權兼
榮有日諸武之衛久火當遷遂改左武衛大將軍康州
團練使皆使任如故若乃國家舉增高之典以揚鴻徽
展頌祇之儀以答貺施薦混元之號以尊妙本侔曲密
之規以事上帝法太微之制以昭祖德肇五門之守以
崇嶽鎮新六寢之位以壯宸居在展寀之初慶成之始
咸有靈命以藥金銀為公貢獻者累巨萬數輝彩絕異
不類世寶靈喻於方丈價倍於朱提豈止丹砂可成方
為食器太山所出遂鑄震蹄然自高真之降格也崇奉
之際唯承珪預卒後玉清昭應宮資善堂都監宗儀使

宴坐黼帷鋪觀貝牒信解出於天縱悟入自於生知指
曹溪頓門則言高達摩覽竺乾半字則義中悉曇實王
毫之化身託金輪而救物未階鋪砌孰望清光而况投
筆端閨屬韃遠戍據案受簡摩看操觚但緣外護之仁
少叙重熙之德謹裁二十有四頌勒銘云

於鑠帝宋氏睿明繼臨照百度恢大功三歸崇正法辰
居憲紫微東郊配蒼震有大除饑女肇營晏坐場九級
締層楹兩朝施寶琬八觚回日月百尋切雲霓七佛儼
金容四聖宗眸表琢刻具千覺圖繪周萬靈鉤檻蔭璇
題高簷幕珠網龍天乍來去煙霞時蔽虧我聞上帝宮

昔在莊嚴殿八萬窓牖柱衆寶極彫飾曷若佛滅後隨
緣宗廟貌設利羅如芥蘇倫婆如果有益若是葉有像
若類多其福已勝彼無量千百億凡惟此聚相密通依
國城樓觀相飛注康莊四通達宰官引鏡吹公候聯旆
旂都人集袂帷玉姬傳車水流景啟清旦行月麗中宵
幡影鋪九衢鈴風間百里我願瞻仰者應起大乘解悟
此見聞性充滿於十方我願供養者應發菩提心覺此
煩惱礙本是清涼源我願掃除者應生精進力反此塵
勞身徑度禪定業我願旋遠者應作三昧觀轉此顛倒
想頓入清涼慧寂念以為地般若以為基正受為花鬘

靈心非覲至尊未嘗輕泄至於黃冶所就靡敢忘施貢
獻之餘則周濟貧也崇奉僊釋時論善之哀哉隙駟難
畱藏舟易失青烏卜宅雖示於歸全太陰練形未知其
化去佳城既啟遠日有期慮宰木之將折懼芳猷之或

墜仰承中詔俾勤堅珉銘曰

靈王之穆世烈滋芳誓淮獻吉解佩歸祥奕葉彌繁異
人挺出性易言簡體放心逸仰緣靈契夙契元真潛通
密命昭啟昌辰慶發祥流禮交樂舉三境開光百神合
序朱房七映密侍睥容舟經九籥潛倅化工官重訓齊
任隆環衛忽痛蘭摧盡疑蟬蛻將壇追寵仙館畱形重

原既卜幽隧爰扁草茫茫兮風烈烈素驂斷兮哀茹絕
岸之曲兮水之陽露寒泣兮秋雲蒼緊夜臺兮巨測唯
令譽兮彌彰

文莊集卷二十九

宋 夏竦

撰

墓誌銘

故保平軍節度使同中書門下平章事駙馬都
尉贈中書令魏公墓誌銘

國家東禪之心祀上朝真景亳駐蹕睢陽肇為京都紀
興王之壤永懷祖德思逮事之臣以忠武軍節度使駙
馬都尉鉅鹿公親舊兼崇勳賢莫貳內出明制進位中
台赴上於鼎司接武於諸相進退體貌無與比焉越明
年冬十月上齋居宣室勤卹萬區以全魏近藩朔垂右

地邊圉之勢勝京師之屏翰士馬雄壯非元功不足以
鎮重遂以公判天雄軍府事政治寬簡獄訟衰止吏民
守闕請立石而紀頌嘉穀生境方優詔而旌美不幸起
龍蛇之歎罹霜露之憂天禧元年正月國家奉有帝之
冊薦尊祖之名祿也廟祧升種郊兆天子均聿懷之慶
舉先親之典制授公保平軍節度使相國如故且詔赴
闕肩輿就第中使相望虛中日望其有瘳搢紳方詠其
多福無何秋氣始至疾疹增劇載紆詔蹕慰以聖言俾
加勉勝之勤尚期勿藥之喜仍賜白金三百斤天不憖
遺福善則虛七月甲子以不起聞上撫几震悼臨哭出

涕書忠甲令彌念於良臣畫像雲臺方追於英烈嗚呼
哀哉真命世之賢佐生人之間傑也公諱咸信字國寶
其先大名獻兆也固流祥西漢肇高平之封東晉啟劇
陽之士冠冕奕世譜牒聯華公之遠祖始家汲郡唐失
天命祿去王室曾王父楚卷懷琛寶遁世而長往累贈
太師兼侍中魏國公曾祖妣郭氏追封燕國太夫人王
父韜襲善以處躬含和而味道累贈中書令越國公祖
妣李氏追封晉國太夫人烈考仁溥仰承積德生蘊明
略往佐周命厥有大勳爰立鼎司兼崇樞府金印雙導
蓋極寵露之威火德應天首宣欣戴之力嘉謀懿範國

史詳焉公之受脈於藩登庸繼業屢奉明祀載洽鴻禧
有司累贈烈考尚書令追封秦王謚曰宣懿母李氏封
秦國太夫人繼母李氏追封韓國太夫人公韻宇沉邃
資質豐碩積懷祗之善教聳公侯之奇表話言詳雅動
止有度初補宣懿隨便都校建隆初起家授朝散大夫
右春坊太子通事舍人先是太祖啟運立極英武睿文
神德聖功至明大孝皇帝龍德在潛人望攸屬秦國太
夫人獲奉昭憲太后太后亦降秦國之第公在幼穉不
樂戲弄瞻視審諦有如成人太后奇之始議姻戚洎乾
德五年五月太宗至仁應道神功聖德文武睿烈大明

廣孝皇帝方尹京邑遣判官劉鼇至第語宣懿以昭憲
雅意翌日召公於南宮延見誨諭久之八月復召公親
引對於講武殿太祖謂曰知善弓馬命射四十餘發太
祖嘉之命太宗賜酒食太宗且諭之云既精射御當留
意文學公由是刻志墳索耽味圖傳五經十七代史尤
其該總復得三式風角之妙後太祖頻召對命射常稱
其善五年三月復召赴講武殿令帶御器械黨進欽等
四人同射以較其能薄暮方罷未幾太宗再遣左右陳
信召公諭以選尚之意四月復召公於內中就食廳引
對於萬歲殿賜襲衣玉帶開裝鞍勒馬七月永慶公主

出降特授檢校尚書右衛將軍兼御史大夫駙馬都尉
賜安定里大第一區夏屋千餘間園館臺榭備焉仍分
御溝水以灌池沼六年加檢校尚書左僕射吉州刺史
太宗即位加檢校司空超授本州防禦使仍備環列之
職太平興國元年并寇未賓寅庫再駕賜公白金三百
觔以治裝公探五屬之甲從六尺之興與左右不違晨夕
匪懈太宗既平大鹵直趨靈龍乘百勝之氣遂乘亡之
敵將幸山北盡埽區落公與駙馬都尉王承衍從容獻
諫太宗納之三年郊祀加檢校司徒四年加檢校太保
六年特詔常奉外月加給錢十萬七年授鎮州觀察使

雍熙三年以獯鬻犯邊王師薄伐朝廷旰食冀方繹騷
太宗分命懿親藩屏近甸迺以王承衍鎮大名駙馬都
尉石守信守河陽而澶淵要區喉咽之地慎擇能臣無
易公者遂命公往撫之賜白金五千兩是年冬公以河
水湍悍舊隄回曲備禦告勞科率為患迺徑鑿新渠二
十里以直水勢繇是十餘年間無衍溢之患端拱元年
朝廷祀青壇修黛帑將籍千畝而郡界河水清澈見底
味如甘醴迺盛以銀缶因公主上之中外稱賀禮畢超
授彰德軍節度使尋詔兼本州馬步軍都總管淳化元
年正月驛召歸闕公主改封齊國九月澶州河大決壞

城壁斷浮梁墊居民阻邊秦物價踊貴太宗召公於崇政殿諭以方略令馳傳而往面賜白金萬兩今上時為壽王賜宴於含芳園公下車之日撫疲瘵賑乏絕境內以安先是朝廷命內殿崇班闕承翰修復河橋比公視事久之功猶未集太宗令健行親事官日賫詔書催督公與謀之而承翰執誼以為方冬聚凌如山水勢涌急難為施力遽入奏乞俟水春公既餞承翰迴鳩集諸工自乘小舸截巨浪排層冰紼纜造舟是日亟就乃遣健步上狀承翰方入對陳難成之勢而公奏繼至太祖大悅顧謂入內侍省都知李神福曰朕選魏某果能集

事翌日公主入賀太宗復嘉歎有晉武孟津之賞密賜

珠玉金寶時都大提點河堤崇儀使劉永恭大庀役徒

修築隄塞盛寒皸瘵人皆苦之公列上其事乞至春初

太宗遣健步賫詔自京一日而至亟命罷役五年春將

修長堤當役夫二萬公自保程其工省去大半太宗令

高班內品李信宣旨命公圖上減工在所尋降詔依之

時境內田隰水退皆填淤加肥而民漂陷之餘耕無首

種相聚愁歎坐待流亡公奏貸麥數萬斛是夏大稔民

樂輸還官繼屬不絕由是人皆處業貧者更富又以州

獄久繫逋欠官物又保任之民資產已竭追償無出公

將上言並詔蠲免今上即位加定國軍節度使公主封
許國長公主咸平二年八月講武於東郊詔充在京新
舊城內都巡檢十月郊裡充舊城內巡檢十一月以控
弦入寇邊城晏開革輅將行羽書狎至命公充貝冀路
行營都總管初無辨嚴時方鎮各控重兵以自衛公至
天雄軍始得步騎二千以隨犬戎之壘煙火相望公左
實右偽虛振軍聲倍道兼行直抵邊郡敵亦憚公威名
辟易而退尋命公男昭亮傳詔召赴行在景德元年上
親握武節北守澶淵公扈從星陳以及凱入二年郊祀
加武成軍節度復以西充與區舊俗豪悍乃命公知曹

州先是廣濟渠兩岸積水居田千頃民用匱乏莫輸其
租公乃度其地宜置水門導之入河人獲其利州下先
多為盜逆旅之舍皆日暮扃戶賃宿者巾屨難保至公
之治也民不敢欺無夜吠之警上朝陵輦洛詔從車輿
四年曹南耆壽列奏借留朝議方以三城右地股肱劇
郡經瀆所控屯兵甚多遂輟公鎮河陽民吏望風畏憚
刑罰罕用大中祥符元年密命開先珍圖洊降上讓德
云岱歸功祖禰公屢陪近輔夙侍嚴祠禮畢加檢校太
尉二年敵使至闕宴豆屢頌上知公善弧矢命公伴射
賜予加等所以旌絕藝而威遠人也三年裡祭睢壤合

答后祗西巡之路頗遙北門之寄尤重乃命公知澶州
兼駐泊馬步軍都總管提舉澶濮齊鄆等州德清軍寇
盜公事賜銀搥大劍各十上幸瑞聖園射弓命內侍宣
旨卿每苦臂痛今日之宴不可辭也公奔馳赴召射中
銀缶上親解之賜開裝鞍勒馬非常典也四年禮畢就
加忠武軍節度復召歸闕爾後真與昭格鉅典交修寵
命便蕃禮數尊異以至開公府正台極歲給公用絳錢
加至七百萬任兼文武寵冠勲威實固之久居大位每
被訪於邊事杜預之既立戰功唯耽思於文籍洎出臨
魏郡也豪右屏迹囹圄屢空雅歌投壺有儒者之樂輕

裘緩帶得名將之體洎梁疾歸第恩禮勤渥殫太醫之
妙伎極內府之良藥命也不淑奄歸窀穸享年六十九
詔廢朝三日贈中書令命內侍省部知靈州刺史竇神
寶營葬事太常博士秘閣校理李垂攝大鴻臚監護太
常考行定謚發引之日有司具一品鹵簿鼓吹太常博
士秘閣校理慎鋪遣奠於順天門以十一月丁酉葬于
河南府洛陽縣賢相鄉勲德里從先塋禮也公一歷東
朝一踐環衛八臨藩服五換旌旄累階至開府儀同三
司策勲上柱國進爵為公食邑至一萬三千九百戶真
食四千七百戶加凌煙之號為推忠保節同德守正翊

戴功臣祿位寵榮並極人爵若乃自刺史陝防秋由廉
車正節鉞皆靡限官序度越等夷斯又國家急賢之恩
於是乎在也恭惟許國長公主太祖皇帝之第三女也
淑質純茂柔儀肅祇處約惟勤在貴能降唐襄城之禮
度為諸親之楷則漢平陽之慈愛享累世之崇重先公
十九年而薨嘗獻瑞牡丹一叢花皆千葉色潤殊絕太
祖命以一枝著金壺中盛以玉盤令待詔黃居寀圖之
以賜公主至今存焉男三人長昭易任內園使頃持使
節遠聘穹廬中塗感疾先公而沒次昭亮今任東上閣
門使恩州團練使器宇不羣識度殊遠太宗以其與王

承衍男世隆皆嫡外孫特愛之幼歲召入並賜坐以昭
亮好學命吟賞花詩立成特賜緡錢御酒命共游於後
苑初未名太宗一日御筆書二名賜之日從訓昭亮今
擇名焉起家授如京使自是每令昭亮押賜公加恩綸
告兩聚貴族繼賜白金萬兩以充六禮之用洎公正位
國相出臨魏郡昭亮往賜生辰禮物賀席方半而驛置
俄至特降綸綽授昭亮恩州團練使仍兼上閣之職聞
者榮之然而昭亮生於貴戚雅好儒術妙達時務詳練
舊章受詔同定闔門儀制廣溢甚多箕裘之業蕃昌慶
大人皆望之次昭侃今任內殿承制風度清粹操履溫

重夙稟詛方蔚為德器女二人長壽縣主率禮公宮式
瞻貴里副笄之日太宗賜白金飾肩輿重七百兩亦以
嫡孫特恩非常例也適內殿崇班闔門祇候張士宗早
七次女蕙問夙聞薜華易落適右班殿直闔門祇候王
從益而逝孫一人東頭供奉官餘慶學稟詩書德茂蘭
玉孫女二人長適故左領軍衛將軍致仕趙保勳男宗
爽次在室皆從訓保阿照言圖史蓋宣懿之積德累仁
公之常善齊物歿後繁衍奕葉隆昌者焉及公之薨也
朝廷追錄大勲誕推延賞授昭亮四方館使團練如故
昭侃遷禮賓副使姪殿中丞昭慶遷國子博士左侍禁

昭用遷西頭供奉官贊善大夫昭文遷殿中丞左侍禁
昭素及孫餘慶並授闔門祇候初遺奏之上也昭亮以
事非禮制獨不列名又慮國恩均被遂上封預辭乞居
喪制恩旨允之斯又忠孝之訓有後之美也如是公資
性方嚴秉心純一至誠待物正色在公其出奉民政也
決事明敏嫉惡如讎彊暴驚服寃滯畢達所至之地人
皆愛之是以歷事三朝寵賤日隆太祖日於鞏洛道中
命御龍官以金盤盛含桃賜於馬上太宗嘗因寒食日
遣內侍岑保正賜御筆令召王承衍等習射於家園并
賜銀缶腥餼等後公鎮澶淵太宗射於後苑翌日以御

射中銀缶命公主賜公令書於家信曰朕昨日賞花射
弓甚思卿故有是賜其恩寵尤異也如此然公雖切享
崇貴深承顧待而每鑒前代之戒小心兢慎過自修抑
故出入五十餘載終始無玷加以忠厚之節發於天性
一物之異不敢家藏太祖幸浴公以園第宏敞奉表獻
之又世有芙蓉丹砂一枚重將一鎰以承隙日則室中
皆明後令壽光縣主以服餌法獻於太宗旋降御筆褒
之賜黃金器五百兩近歲國家新宮闕之制令昭亮懇
奏願納奉人以助經費上優詔不允論者美之又仲兒
太僕少卿某之疾也自澶淵乞赴闕侍疾及其加有也

上章乞授少卿長子昭度一官尋授太常寺太祝其弟
悌皆此類也每好夜坐召兒姪輩諭以君子五身之道
雅合經典之意自感疾至薨氣貌不衰精識自若人皆
以為修德之報焉佳城既卜遠日有期諸子以某備列
西臺久塵吏職稔聞世德嘗奉緒言見索斐辭以識徽
烈讓不獲已謹為之銘銘曰

炎正啟運帝賚忠賢九功並建百度勤宣下寧海域仰
清垂象教化之重倚之國相內撫方嶽外清邊塵軍旅
之要付之將臣允顯魏公位兼文武槐鼎登庸節旄分
土左右王室事上以忠朕肱右地待下以公敷聖之心

念功惟舊白水攀龍湛恩克懋博叙之典立愛惟親秦
臺降鳳寵賚斯勤佐國承家謂之世德闕閱之勲載於
金石安人去患謂之民政藩屏之治播於謠詠密謀潛
慮莫際其涯獻贊帷幄惟聖用嘉高鳳遠度莫闕其與儀
表紳冕惟賢是做哀哉良相百福宜全嗚呼彼蒼何
奪之年桃茆臨喪密章加秩帝極哀悼禮贈優恤寒風
慄兮愁雲暮鹵簿陳兮班劍布卷組帳弓空煙儼靈輻
兮戒路哀笳咽兮楚挽悲切之麓兮洛之湄從先王兮
魂不昧掩幽窆兮夜何其有旗常兮名不朽有琬琰
兮英威可久繫似續之良賢兮永蕃昌於厥後

故守司徒兼門下侍郎同中書門下平章事充

玉清昭應宮使昭文館大學士監修國史冀國

公贈太師中書令謚文穆王公墓誌銘

并序奉
敕撰

天聖三祀歲次星紀黃鍾布序丙午建辰皇帝御琯輿
詔金蹕出景龍門幸永定坊北第視大丞相冀公之疾
賜白金五千兩戊申丞相薨于位享年六十有四丙宮
震悼皇太后車駕臨哭盡哀天子素服三日不視朝以
太師中書令告第大小欽遣尚宮弔祠法賻加等有司
謚曰文穆命左史攝鴻臚御副內侍太監送喪官給經
費具本品鹵簿以明年仲春之壬申歸全於濠州鍾離

縣廣德鄉西原之祖瑩有詔侍臣書其徽烈公諱欽若
字定國其先緱山遠系潁陽茂緒武岡睢陵之材啟國
於晉永寧清源之德胙土於唐本居太原世為島族高
祖諱遂以巢寇之亂避地江楚喜玉筍之岑寂惟厥田
之沃衍始家宜春之新喻遂生遐仕至江南西道監鐵
巡官遐生郁幼而警悟不樂嬉戲徧誦五經偽吳童子
擢第釋褐本縣尉諸郡累表為戎佐視秩臺即關決郡
務歸朝為懷冀濠三州判官郁生仲華夙有志尚刻誦
墳索為唐明經中選又以五經登科復尉本縣時議榮
之公即濠州府君之孫新喻府君之子及公之貴三代

皆贈太師尚書令兼中書令曾門封冀祖廟封鄭禰室
封晉皆為國公恭惟鄭公當五代分競仕偽唐之僭據
轉側江介間關世路而能治尚清約志在平反愛慈孫
以字升卿高門閭以容駟馬克祚厥後何其盛歟公聰
識早成性資強敏六歲喪母十二而孤鄭公愛之保育
於祖妣魯國太夫人教于家庭不就外傳道藝兼該辭
筆瞻逸弱冠初拔進士解淳化中策高第世吏芸局從
事譙幕加倅職再毗戎務被舉遷秘書郎典關市于泚
上升朝為太常丞理通欠於計司以右正言歷掌內外
書命授左諫議大夫再遷工部侍郎并衆大政以刑部

侍郎充資政殿學士改兵部充大學士繇尚書左丞三
轉至吏部尚書皆知樞密院自檢校太傅再加至檢校
太師行尚書右僕射並使東樞實兼宰職俄以左揆兼
中書侍郎監修國史對掌魁柄以太子太保判餘杭歸
朝再為資政大學士尋拜司空未幾視秩維師兼榮鉉
府節制襄峴居守伊洛輿疾還第左遷司農卿改秘書
監並分務南都起授太常卿典濠州轉刑部尚書知江
寧府召還復序正司再升中書兼門下侍郎充昭文館
大學士實首召席遂作司徒乃封冀壤勳階爵邑名數
咸極初永定在御憲章大備以駟牧之重領于樞臣公

嘗為羣牧制置使肇玉清昭應宮以事有帝崇景靈宮
以奉真祖營會靈觀以禮岳鎮並建職局綜於兩府公
繼為三宮觀使惟公事三朝相二帝嘉猷亮節深圖遠
笑秘諸信史此不獲書若夫建隆以還萬國上計辟名
既辨斷盜未償領于司存列之辭案人生有訖吏責無
窮公抗疏切陳援救蠲弛深達國體克稱上仁注意之
求實自于此咸平初寇劇緣間搖亂益部偏師致討刻
削厲階武臣尚威傷斬過當餘孽亡命反仄靡遑公往
宣使指悉貫枝黨處置機事彼方遂寧召參台衡刻印
以待景德始邊城晏開羽檄四馳烽火相照公感憤激

節慷慨請行并護將臣克全魏壁洎乎元符候日奉高望
幸三事優游而未決禮官希濶而難講公首抗大義先
置喬岳芝英醴泉之品喬雲叶氣之祥圖素寫形使驛
言狀旁午亭傳覺悟黔黎此其昭昭者也若乃尊事神
祇專精齋祭寅威妙本校正真科交集上儀莫匪嘉慮
是以再長樞軸三陟正司中外迭居左右更踐體貌無
比論議必從寵冠一時年踰二紀至若獲牲惟壤徐鑾
曲里登魄寶之號熙報况之壇奉貞像於琳宮宣寶文
於路寢宮繼掌禮儀並持使印又若明禋歲事珍符先
道聿嚴容典奉以金輿公三職儀衛殊庭考閣常錄是

藏內出丹書勒於瑤簡公同司刻玉並兼置使之重益
為希代之榮祥符之間天下大治制有破觥之易法有
漏魚之寬太和陶蒸善氣回襲雲物絢色羽毛絳質百
嘉茂育萬瑞畢臻天子好文挺睿辭以昭紹惟公順美
著嘉頌以游揚前後賜御製屬和并御和賜歌詩僅三
百篇若夫入幹庶績出撫近封鋪陳密議條對急政所
受詔荅將二百函又奉命纂集翊聖保德真君傳三卷
撰進先天紀三十卷五嶽廣開一百卷鹵簿記三卷與
諸儒同集冊府元龜一千卷彤管懿範二百卷又封祀
既畢歸尊宗廟承詔撰僖祖太祖太宗謚冊神聖纂服

初受鴻名奉制撰今上徽號冊文及前後被旨撰社首
壇汾陰朝覲壇頌西京應天禪院太原資聖院碑銘天
書祥瑞西祀瑞贊彤管懿範序廣孝泉崇真橋記再耕
封東平公贊博雅多文盡在茲矣公嘗言初晉公侍鄭
公之任武昌也公母秦國夫人有娠江水壞解舍徙居
黃鶴樓既夕而生公或言漢口居人遙望樓際若有氣
象然公居景高行視圃田暮宿村廬夜分偶起見天中
有赤文成紫微字使蜀言旋次褒成驛有客為謁具唐
相晉國裴公之名告公以默定之期而隱公嘗朱篆所
見文字及因鄂守增飾黃鶴樓又以俸錢修圃田晉公
祠為文書石以紀之常練氣於朝霞期脫屣于塵世姚
顛承白衣之報子房慕赤松之游參實于斯諒不誣矣
雅好奕碁善于筆劄樂醇旨之飲喜清商之樂第有北
園疊石為陂甘果美木^蔞在其下退食休澣於焉游息
晚年親歷艱難頗厭富貴延問高釋留必直際遂兼譯
經使二府柄臣送上於傳法院梵鄉薦香大官其食歸
第感疾請告累旬侍醫盈門詔使係道錫萬金之良藥
殫九折之妙伎天乎不弔命將柰何輟相興謠見於斯
矣夫人李氏山河象德圖史時憲哀深惟殯痛極終天
送往盡哀庇親惟睦累封崇許二國夫人有子五人皆

先公而亡。內次子從益仕至贊善大夫第三子慶之終
于衛尉寺丞追賜進士及第女二人長早亡次適故參
知政事張公洎之滴孫秘書省校書郎瓌孫女一人適
故尚書左丞陳公恕之子大禮寺丞執禮並懿行美材
大宗良配外孫男元壽女壽姐並幼遺奏之上也二宮
哀軫錄舊念勲並加常制嗣男將作監丞寅亮授大理
寺丞環遷大理評事充秘閣校理執禮改太子中舍又
以公叔父仲微剖竹列成累書吏課握蘭建禮寶綜虞
衡薰秋曹之覆刑主大農之平糴特除司勳員外郎充
淮南提點刑獄勸農使自餘戚屬授官親信叙用者二

二十有四人嗚呼高朗令終寵靈顯赫會元公之殯送
文恭之喪極人臣之盛公以臣嘗豫察舊屢刊史謀爰
有治命請誌幽礎仰奉宸旨不獲固辭謹作銘曰

兵政宥密機軸穹崇惟公再踐昭事功兮將鉞在庭相
印垂組惟公保釐薰文武兮洪鑪造物威柄御人惟公
三八秉國均兮龍章在躬庭槐表位惟公經邦極名器
兮帝師尊異內極隆顯祿以印章豐贈典兮乘輿編素
笳吹悲鳴送以纁玉盡哀榮兮

故順容邵氏墓誌銘

大中祥符九年春二月甲午順容邵氏薨于京師太和

宮本院之正寢越三月壬子葬于開封縣清遠鄉繁臺
村奉先資福禪院之東北原嗚呼哀哉順容諱昭明廣
陵人也生稟嘉慶處麗柔儀泳漢方江動謠於南國規
圖照史秘景於華宗先聖在潛懿藩初建金房入侍實
首於庶姬璿室沉英嘗悲于外館洎攀鱗上漢列職司
衣奉楊襲之宜便采章之品肇封近郡寔啓博陵爰以
燕寢獻功女侍更直佩環異等禮序多儀迺進號於小
君實並長於九御被之紫服昭以寵章矧屬革輅弔民
躬平大鹵宸旒耀武出撫魏都束帶從行羽書狎至罄
宣懿立以及凱旋繇是賜塗金之裳陞榮于太監闢冀

國之壤列位於尚宮肅奉曾闡總司衆職嚴筦籥於局
禁謹琮璽于緘滕法式並修出納惟允暨夫白雲厭代
蒼震承祧改榮波之邑封奉壽宮之象設西陵極望莫
從于神遊中禁言旋復司於舊物逮珍符錫瑞之紀號
喬岳上封之明年超踐宮正之資載疏安陸之國翼宣
忠訓糾肅羣居閑練典章詳明啟奏下推耆重之德上
嘉該總之能遂開張楚之封特拜司宮之命寔創斯號
以旌厥勞然而進退有常終始一志含華凝曜久冠於
小星積德累勤繼克於彤史上肇崇位置尊獎老成寵
以絳祀列於嬪職翟鈞九等班亞三妃感泣帝宸賜予

加數承顏如帷進見異儀官掖之榮近代無比旋以憂
勞成疾年德寢高深惻上仁遷居別館勉膳之使承詔
之醫自冬涉春相望於道嗚呼收華麗日喪淑泉高常
珍之期不及者二歲嚮用之福咸備于一時黼帳悼懷
椒塗頌賙佳城既卜幽隧將封爰詔左言圖徽沉碧銘
曰

瑤臺降芬甘棠遺慶德茂材淑性資淵令參華六列盡
瘁兩朝閑練儀範勤勞夙宵徽序方隆餘年奄謝結戀
昌期銜哀長夜圖形藥館卜宅金園飾終之典永賁重
原

皇姪康州團練使夫人呂氏墓誌銘

夫人呂氏故丞相贈司徒正惠公之女正惠公之貴也
曾祖哀贈中書令祖琦贈太師尚書令其先太岳述職
仰悟靈心尚父表海下因舊俗景祐垂世積德在人門
生忠賢亦啟明淑夫人夙稟家訓幼勤女職動則申禮
保阿是卷丞而獻功紘緼悉脩言念詩史之意步中珩
璜之節加以文繡設色必窮其麗哀筭度次尤盡其音
國家璿源熾昌仙緒蕃衍選建明德廣封連城棟宇相
依犬牙錯峙上隆博叙之化下嘉信厚之風扶植基幹
畢侯支庶崇右戚之惠盡家人之愛至若宗子授室王

姬下嫁必選令族以納多祥楚王親則帝凡位極人爵
寶玉分器芝蘭在庭其第四子天水郡公允誠生稟粹
和早聞詩禮懷金上存結綬內朝號為宗英特茂宸寵
始娶贈邠州觀察使潘惟正女不幸早亡宗臣上言禮
當繼室上乃念正惠之昔佐先帝厥有大勞當綴衣之
辰受傳聖之命寢丘之封雖遠高門之慶未移乃詔申
以婚姻寵其闕閔故獻吉踰人世之祥大璋納禮豐
六版之敷夫人遂以大中祥符五年夏六月乙丑召見
漢帷進對堯門象服暉華拜賜于中禁油輶擁從言旋
於舊居觀者榮之忠臣知勸越明年秋七月辛亥歸于
郡公六珈盛飾百兩親迎僕御授綬傳姆加景華燭光
焯煌煌如晝從者畢袵初初若雲有司相儀太官供具
婚姻之禮特盛於茲洎五月中衆三月廟見象栴居手
寶翟在衣動止肅雍詞氣舒婉式瞻貴里為憲宗家若
乃薦豆公侯之宮胖載舊姑之室匪難之勤儆戒惟絲
之求善正蘋藻之意柔潔山河之體容潤固已極圖傳
之言豈止率鞶褱之訓者哉方將下司封之詔舉從夫
之典啟湯沐之邑增車服之數而薜華易落隙駒難駐
德宮永逝雖大化之攸同碩人無子痛芳音之莫繼嗚
呼哀哉以七年秋九月壬寅終於內寢享年十九尚宮

賜祿輟朝二日權厝於奉先資福禪院以天禧元年八月已酉葬于河南府永安縣南訾鄉漫沅村潘夫人墓之西北原從吉卜也詔左驥驥使澄州刺史入內侍省都知張景宗營葬事以著作郎直集賢院徐鉉攝大鴻臚監護欽封有日執紼將行乃命史臣圖芳幽礎銘曰

降神靈緒賜履遙源間生邦媛選儷宗賢顧史永箴披圖問禮德盛年闕華繁實委梁臺遣奠兮組帳煙空文園安宅兮松路塵封哀蘭儀之永閱唯玉譽之無窮

文莊集卷三十

宋夏竦撰

古詩

奉和御製看毛詩詩三章二章十二句一章八句

周道洽平聲動文成周王棄善俗移風變哀樂異心治亂珠音心發言從影響攸同政行音類堯箎靡異實教化之所由故能經乎天而緯乎地

生民尊祖時邁告成江漢撥亂鳧鷖持盈四詩之道始于和平五際之變通于晦明宣宥密之基命敷適駿之

休聲或箴規于闕政或歎咏于芳馨

溫柔之教政治之源瞽能誦弓可以諫士不學弓無以
言蓋盛衰之所繫故諷諭之攸存惟聖心弓垂思永大
底弓元元

奉和御製迎聖像中路獲金龍送還茅山

巍巍真像範金成瑞節棠舟遠導迎精表勵翼符神貺
藻衛歲蕤率禮經蘭隄曉景連漪靜神龍報降祥雲映
雙上瓊千采質明旁臨旌棹靈輝盛台臣祇肅薦華薌
承賀凝貞拜露章羲氏官名高可擬漢家年紀遠難方
鳳蓋分陰騰九色蜿蜒共戲雲裳側御天飛躍世空聞

瑞德縈盤今始識駸駸矯首仰中宸丹宸深嘉美應臻
紆禮既能疇聖日為霖當使福蒸人華陽翠壑貞靈地
星使送還彰睿志更播雲章入管絃昭昭億載傳金匱

奉和御製崇政殿宴從臣

青綺禁門符命錫離珠御府天琛積兩儀流慶會休期
二聖詔謀歸盛德大禮修真猷格懿鑠昭昭弓靡極阜
民財形物力聖志乾乾弓夕惕金扉玉宇麗皇居鳳藻
鸞蹤輝樂石龜趺螭首建靈辰鵠尾龍香奉至神日轉
翠華臨閣道天旋丹仗復鈎陳縉紳戎寵弓踰三接羽
衛鴻儀弓備九賓瓊觴傳滿弓均堯酒栢殿賡颺弓洽

漢臣奉若靈心彌翼翼布昭醜化愈淳淳
奉和御製為政歌

黼帳夜分常監寐鳳軒端委敷文治肇建元封陟介丘
寔尋空祀臨汾水茂烈馨香久際天精心勵翼彌恭已
體道推仁洽惠和斷凋歸厚蠲華侈懷柔四貊盡來庭
邊圉無塵似平砥堯德欽明悖茂族漢條寬大措祥刑
永觀禹畫同文軫更佇虞巡審量衡睿政無為猶日慎
布昭謨訓掩湯銘

奉和御製奉先歌

皇家弓仙祖上世分聖神承雲分分治駕羽分臨民誕

昭兮馨烈高陟兮元真載乘土運臨三古屬象義農振
遐武爰炳明靈陟上蒼繇繇聖緒慶悠長既積仁兮累
德爰振耀兮流芳馨二儀兮垂祐彌萬祀分開祥巍巍
烈祖兮膺宸歷御瑤圖兮建鼇極東征西怨兮振羣黎
下舞上歌兮康庶國優游亮直顯敦仁錫羨休嘉符拓
迹四貊名王尺組羈九涯遠道安車適聖功耆定實登
三方畫駿奔惟旅百赫赫神宗廟帝紘昭廣運兮洽和
平禮適素青兮泐夏子化歸醲粹兮復胥庭憲六學兮
昭地緯事七廟兮奉天經震疊威霆兮踰朔幕汪洋惠
露兮浹編氓偃節靈臺兮黜武漏魚寬網兮蠲刑三葉

緝熙分隆紹繼皇穹右序分隕繁祉徘徊颺歆分授元
符焜燿樵蒸分修茂禮思文成頌分迪先謀多黍申歌
兮昭樂歲象侔開闔已無為夏鞏盈成彌若屬惟寤寐
兮符通實天人分合契降僊馭分自三清諭靈源分踰
百世遐錫鴻休茂本枝永符盛德昭明類薦徽冊致清
衷齋明分顯至款太空告繁禧監觀分斯暨對越分儲
精聿懷分忘寐烏奕千齡播德芬欽崇茂典協經給神
化有開彰密命慶基無際等高旻

奉和御製筆歌

制之精分漢宮之雙管命之妙分趙國之修毫自承掌

握濟羣用觥與漿分難施勞古今罔不達淑慝將何逃
深仰玉蟾均硯滴分詎慚金馬制書刀頡皇觀迹蟲篆興
纖端積潤八體成分寫圖始告姬公瑞錯寶終傳路扈名
上聖惟聰炳帝文分宸章奎畫冠生民灑翰翠珉垂睿式
珥彤丹地寵儒臣

奉和御製硯歌

南方潛璞出寒溪分沉沉紫蔚凝堅姿兩儀肖象磨礪異
三趾承隅琢飾奇分銀帶參華負雙闕玉蟾分滴潤圓池
微波澄淡當晴景分旌旗半浸龍蛇影輕浮春絮拂犀籀
微動日華明綺井分藁簡交輝九禁深玉枝斜照中宵永

列璇臺兮今得地
邇清光兮叶靈契
宣絲旨兮揚聖謨
贊雲章兮熙睿志
彌彰盛德冠生民
務以文明化兆人

奉和御製墨歌

昔造圖書兮紀方志
銘黃丹漆兮初為貴
後世增華兮邁昔賢
松煙布色兮明且妍
一枝均賜官儀備
九子兮形吉禮全
寫功詠德盈緗帙
體物緣情徧綺牋
陰山潛璞兮琢金池
相須藝圃兮事攸宜
湘川青管兮束圓鋒
並列璇臺兮用本同
垂大訓述微言
孔墨之教兮長存
騰藻翰贊儀形
淵雲之妙兮惟精
上聖敦仁崇儉約
厥篚珍奇詔皆却
唯許隄庶歲貢臻
式彰文德化生民

奉祀禮畢還京

先天密命啟禎期
侯日靈文降紫闈
恭館靖寘尊妙化
帝居齋被擁純禧
勳鴻昭姓增梁甫
報本祈年款魏睢
真御下臨彰日監
嘉生誕降示天隨
丕承寶緒增寅畏
惠迪靈猷務肅祇
國陽郊報尊天位
欽奉后祇將合祭
仁里爰瞻嚴父祠
徐鑾式徇黎萌意
攸司經始兮載嚴
象物應斯兮紹至
熒煌先道兮珍符
煥衍參塗兮藻衛
真場合奏兮笙鏞
靈趾欽柴兮主幣
三氣辟容兮仰覲
人景飛輿兮降格
青祺簡簡兮淵冲
瑞命穰穰兮山積
合飲譙城洽睿慈
仁風溥暢宣和澤
制畿睢水煥先謨

惠露汪洋敷潤澤納賈陳詩兮總舊章念功繼絕兮昭
明德近甸回衡景念新太宮歸格物華春太和充鬱層
霄外協氣周流率土濱穆穆天章騰聖域巍巍道蔭庇
生民體元化叙彝倫順則兮穹昊觀祕奧守精真謹度
兮聲身四絡兮來同千齡兮應會甘實兮積中英純兮
發外皇哉曼壽保丕基青簡遐昭帝者儀道冠周詩心
翼翼功踰夏載日孜孜

奉和御製玉清昭應宮甘露歌

祝聖清場初展禮鴻都何曉彰繁祉鬱鬱織枝正後凋
灑灑瑞采俄零委吉雲五色比還疎况是嚴冬歲律餘
承以玉杯甘若蜜凝于翠幄皎如珠薦宸居稱壽酒宣
大慶兮仰歸元首香馥馥旒央央建靈壇兮茂對多祥
天心信與人心會誕節將臨遽霑霈式昭真蔭祚君王
永錫遐齡齊覆載

奉和御製宣讀天書

赫赫穹符迪慶基巍巍真緒擁繁禧控飈靈御傳天意
候日珍文告帝期奉指喬丘彰錫祉昨壤瀨鄉修茂禮
宸闈薰被款雲輿戎候耕耘藁象弭紀號惟新歲歷呈
三元初吉協休辰徽冊奉天熙事歲丕名尊祖皇儀展
太宮薦鬯孝思伸陽位升煙鴻慶遠瑞應紛綸百福同

寅威寶命務尊崇布宣精意誠明顯申飭攸司憲度隆
將披秘蘊昭靈契欲使萬方知帝意肆青端門詔畢旋
靈場預啟百枝燃夙陳路寢敷瑤席躬薦真香奏瑞煙
三辰淳耀居齋室階滿祥冀當望日大裘陟降既登歌
羣后延登皆上笏元輔披騰聖訓揚樞臣援翰寶文彰
有虞出洛龜休躍唐氏銜圖鳳罷翔辭若洞章皆捷句
字如龍篆宛分行森况虎旆嚴真衛肅穆珠旒增潔志
敬受丹書豈易俾式旌玉刻誠難繼修修羽帳降星辰
杳杳颺旂駐聖真庭際煙霞輝暎暎天中鸞鶴羽矍矍
微密妙言爰備舉龐鴻盛則已宣臻一一嘉猷保元后

諄諄深旨為含生寫成別笈緘密薦獻禮周彌襲吉
恍恍真心顯道樞穰穰景佑歸宸歷升聞璿宙洽神歡
昭紀琅函為睿式萬靈潛衛極寅威九序相趨皆勵翼
緜寓彌隆清淨風虛晨益鑿馨香德豈獨飛英冠百王
祇延道蔭永歡康薰弦濟發南風詠丕顯清表報彼蒼

奉和御製幸金明池

朱輅乘時兮出曉烟飛梁承幸兮斗城邊幔省蔭堤兮
楊葉閣星旄藻岸兮物華妍珠網金鋪兮豫章館風檣
桂楫兮木蘭船象潢儀漢兮澄波遠激水尋橦兮妙戲
全仲帝暉兮凝制蹕人煥行兮歡心逸嘉流景兮延邇

臣樂涪明兮麗新曲

奉和御製七夕

紫皇宴服出瑤臺
仗下涼宵水殿開
初月上弦光汎艷
橫河案戶勢徘徊
扇兮蘭露侵衣滴
簾捲天香拂帳來
閣道森沉飛絳節
龍璫鳳吹凌霄發
琬車縹緲際煙濤
鈿砌迢迢望雲闕
百子池深列宿分
九微燈淡織塵絕
雲屏輕篋貫雙針
彩縷縈風勢不任
露挹瓊蘇敷碧席
明霞照地光無極
西漢元封五葉時
倚蘭雲輦會真期
何如法坐嘉蕃熟
高振薰絃播緝熙

黃鶴樓歌

城上危樓高縹緲
城下澄江復相繞
有時漾影入中流
俯看魚游仰飛鳥
近樓多少未行舟
滿江落花灑汀洲
人同江狎不怕浪
登樓對酒彈箏篴
大別山頭白雲起
金口渡邊雨如洗
半鈎新月上孤城
還照高樓與江水
晴江依舊瀉潯陽
黃鶴無由歸故鄉
一聲玉笛起何處
燕撲闌干花影長

文莊集卷三十一

五言律詩

三月施州進金色小龜

清江涵德澤嘉瑞效靈龜巢葉形偏小如金色最奇五
靈慚異質繹屬近幽姿騎置遙承獻觀圖仰帝祺

大中祥符七年七月錦州奏天慶觀修聖祖殿
畢五色雲三朵各方丈餘見於殿上

仙祠成祕殿遠近在盧陽旭日初流景卿雲忽降祥三
枝分玉葉五色照琳房元后成真蔭欽柴報上蒼

宋

夏竦

撰

八年正月天慶節上清宮行香錫慶院御筵日
揚輝有非煙非霧之雲

寶錄標嘉節需雲錫惠筵烈暉騰愛景瑞彩擬非煙焜
燿璿霄外輪囷絳闕前居歆方屢告偉兆溢祥編

明州進芝草并圖

四明開奧壤三秀發靈芝如蓋殊形聳無根瑞氣滋晨

敷台嶺異日茂下房奇善氣方回復充圖獻玉墀

奉御製讀史記詩

三首并注

陶唐明歷象

克欽若昊天歷象日月星辰

茂氣與天通

堯明時正度茂氣所生民

無天

舉正分星度

以四方中星定分至

歸餘定歲功

以閏月孟陬

名不殄南正道彌隆

顯項命南正重司天三苗亂德孟取殄滅堯復重黎之後使典之

自此垂三代循環協大中

三五之正如循環窮則反本

昭昭齊魯事千載著良箴

齊魯報政欲辨為邦體先觀可為箴規

布政心繫政之繁簡

變民非遠畧伯禽曰變其從簡是為邦之否城

德音太公曰簡其君

北面無餘意識因惠物深周公曰

其北面

漢武將從禪須如亟釋兵武帝將封禪先北甘泉誠必

祀武帝至甘泉為且用喬嶽紀尊名司馬相如封禪文

加禮崇休祉武帝上封畢縱諸修封蓋號榮漢武帝凡

禪文曰蓋豈同承帝錄肆覲正權衝國家奉元符封云

號以况榮

二

非漢所及也

奉和御製讀前漢書

三首并注

鄴侯依日月贊曰蕭何漢興天漢聚隆昌沛公初不欲

語云天漢其稱甚美邁德居三傑何與張良韓觀時定九章何擴

法取合于時者過因王尉辯廷尉王衛尉諫出之功賴

鄂君揚高祖曰何雖有秋進曰何功當第一終以同心

美贊曰何與曹參二清寧贊後王曹參相惠帝民歌曰

曹參代之守而勿失載其清靖民以寧壹

子房天授漢沛公常用張良策不戰道尤尊良未嘗有

為王師秘法盈編受編乃太公兵法危機借箸論擣楚權

良借前箸籌之避封昭止足良避齊辟穀厭塵喧食穀不莫訝

蕭規茂從容有緒言良勸高祖立蕭何為相

高祖寬仁主漢高寬淮陰變詐才時之權變以詐力成

功設壇誠有禮高祖設壇場推食本無猜信曰漢王授

數萬之眾解衣衣我推食食我言聽計用懷惠初顯若我涉蒯通說信夸功

抑殆哉信對高祖曰陛下不過何如中正者千載仰高

裁贊曰異姓而王者八國終于滅亡惟吳萬之

奉和御製讀後漢書詩三首并注

明帝章朝物贊曰備三雍復舊常光武建三朝之籛金

賞西域永平中復通西域諸國皆遣子入雅樂奏南陽

十年帝幸南陽拜老鴻微茂贊曰臨祈農盛典彰帝耕

祠舊宅作雅樂農事珍符昭美應獻壽表隆昌百官以帝祥物

獨行懲澆俗歷代惟後漢書有獨行傳序云以事嘉名

動遠荒王烈以德威人居至誠祈夏雨諒輔為廣漢五

未日中而雨嚴意勵冬霜霜戴就陸績也果行推陵險

世稱至誠序云蹈于陵險豐規歎履方贊曰乘方不成注云孤高

繆彤李善也惟大遜壽考茂祺祥李充字大遜有高節

昭公詳漢律求比禮三千陳寵字昭公為廷尉鉤校律

威儀刻敝深文息寵為奏每附經典從寬平治德全

三千願蕩滌煩苛全芳猷宣輔弼寵為司空奏議

至德章帝納之務于寬厚溫粹為相稱職

餘慶茂忠賢寵子忠為尚書方驗來嘉瑞仁於理最先

章帝納寵言除慘酷禁五十餘事是

後人俗和平屢有嘉瑞又云寵性仁矜

奉和御製讀三國志詩三首

白馬當塗兆黃家得歲興金符威既重玉版事堪憑漢

火承前運譙龍合舊徵青雲開後葉下武倍兢兢白馬

雲曰許昌氣見于當塗高者魏也或遺太祖書曰黃家

當立芝曰得歲星者道始興今歲在大梁魏之分也太

圖雖未遂嘉慮實惟精終闕尊崇禮何關慎器名曹公

昌孫策平江南曹公力未能逞以弟女配策小弟匡後

帝遭刺客不遂評曰割據江東策之基兆也欲襲許迎漢

而權尊崇未至孫盛也權豈各名器者乎

家乘桑蓋瑞國富卧龍才漢水神暉徹靈圖密命開橫

天嘉氣應繼日景雲來儻乏英雄器三分亦殆哉先主

南有桑如車蓋或謂當出貴人徐庶謂先主曰諸葛孔

明卧龍也劉豹等上言曰河圖洛書皆有備稱皇之文

又時有景雲祥風從睿璣下來數有氣如旗從西至東

魏三分天下雄之器時與吳

奉和御製讀晉書三首并注

安石陵霜致謝安字安石史臣曰清言振玉音安少詣

言濛曰此客疊鴻勳濟世久劉裕以安厚德感人深

疊為來逼人城築埭後人追思朱組雖然藪而襲朱組虛舟豈

易沉贊曰太保浮東山高志在瀟灑謝塵襟安雖受朝

之志始末不渝形于言色

李重推清雅初傳友愛名嘉言為時發大誼傳經明崇

德誠堪慕修身豈易傾留心象才舉千載仰銓衡李重

以友愛著稱贊曰嘉言在茲重遷中書郎每疑議參以

經典為平陽太守崇德化正身率下為吏部郎羣才畢

行累立武功嘗運甃齋外曰吾方致力中原恐不堪事
其勵志勤力皆此類也侃機神明鑒似魏武忠順勤勞
似孔明陸抗成帝詔曰乃者桓文之勲伯舅是憑初侃
丁母憂有二客來弔化為雙鶴冲天而去又夢飛上天
見天門九重已登
其八墜地傷左翼

奉和御製讀宋書

二首
并注

漢宗開聖緒

宋武帝漢楚元
王交之後也

得歲與周同

帝初封宋公
歲在大火與

武王克

金石終移律

史臣曰至于金石
變聲柴火改物

山河始誓功

宋封

公策曰永

飛名傳祕記

河洛識曰二口建
戈不能方劉

祚山河

女子獨立又

嘉識起游童
童謠曰木巨當
北度走入浩

為雙奴字也

能使姦豪訾誠為一世雄
桓靈寶

中木巨言桓靈寶也

能使姦豪訾誠為一世雄

桓靈寶

鎮惡才明舉英雄想冠時推鋒平內侮直指定西陲向

使鴻勳就寧憂霸業衰如何喪方召遺烈漫傷咨

劉毅于江陵滅姚泓于長安餘寇未殄為沈田子所害

宋高祖表之曰鎮惡機略明舉又曰荆南構釁憂兼內

侮鎮惡輕舟先邁一朝霧散王師西伐有中原入渭之

捷指麾無前實國之方召也殊績未酬宜蒙追寵贈左

將軍史臣曰鎮惡推

鋒直指前無疆陣

奉和御製讀陳書

二首
并注
猛奴多勇槩大稍事戎征
周文育小字猛奴父蒼令兄
子辭教書計文育曰誰能學
此取富貴但新蔡兇圍陷
文育往新蔡慰勞白水蠻謀
執之文育前鋒陷陣勇冠軍
有大稍耳
初武帝表文育為府司馬李儉任將杜
中魚梁寇壘傾
平虜于魚梁作城文育擊之平虜棄城
而遡風輕古法
武帝拒徐嗣徽將戰風急帝曰矢不遡
走遡風輕古法
風文育曰何用古法抽稍上馬衆軍隨

之風亦尋轉間道貴奇兵余孝頃舉兵應蕭勃文育燒柵偽過間道信宿達羊韶據其中間築

城養士賊懋賞宜開府禹已盡平以功授開府

靈洗雖驍勇程靈洗少忠規詎可輕石城嘗力戰靈洗

僧辦武帝誅僧辦靈洗力戰于石黠歛本連盟初侯景

頭西門招諭久之乃降帝深義之武帝授靈洗蘭陵

洗據黠歛聚徒拒景奉京口如勳茂太守助防京口平

新安太守蕭隱主盟周迪重寇臨川靈洗為既能明

徐嗣徽有臨川叛寇驚都督擊之迪走山谷間既德之分

功封侯靈洗性嚴急御下苛刻而號令分

號令何惜務寬平靈洗性嚴急御下苛刻而號令分

奉和御製讀後魏書三首并注

偉哉登國世靈武定戎兵拓土龍圖大求才實勵精公

侯新爵重臺省舊風清自匪謨長世鴻圖豈易成奮其道武

靈武遂啟中原拔擢才識憲章故實制爵四等追錄舊

臣啟建臺省悉用文士制作經謨咸在長世登國道武

號之紀也

高祖寬仁主哀矜信有餘嚴刑幾盡措黎庶獲安居高祖

法躬刊定繁文再剷除既平財謁路清白勵簪裾馭字

留心刑法詔曰參詳舊典務從寬仁帝哀矜庶獄卒從

降恕京師決死獄歲不過五六置謹法者數百人防喧

關于街衢使民安其職業命中祕官修改律令舊文經

御刊定詔曰門房之誅猶在律策可更議之刪除繁酷

又遣使循行天下糾守宰之不法

法食祿者跼躅財謁之路殆絕

真君昭密命紀號表興隆瑞著洪河外文成翠石中帝

名傳祖彌歷數感王公三五方興運明符事亦同世祖奉天

文圖錄紀太平真君之號五年樂安王策等奏曰臣聞

帝王之興必有受命之符三五之盛莫不同之令張掖

七

郡列言人柳谷石青質白章成文記國家祖
宗諱著受命歷教之符王公已下莫不感動

奉和御製讀北齊書二首

并注

段氏推忠武論兵特造徵歷朝功並建諸將令咸依重

位無矜色高門有德輝當時勲貴族孰不仰家肥段詔

武善于御象得將士心臨敵之日人人爭奮教訓子弟

閨門雍肅當世勲貴之家罕有及者高祖曰吾與詔論

兵殊有英傑史臣曰詔輔相七君志謝矜功名不逾實又贊云詔大其門望以德尊

咸陽誠赴赴倚任極維師貴勢隆門緒忠誠翼帝基享

年常戒滿避寵或興咨不學良無媿嘉名已自垂斛律

太師封咸陽郡王一門一皇后二太子妃三公主尊寵

之盛當時莫比嘗謂子曰我雖不讀書古來外戚無不

傾滅我家直以立勲抱忠致富貴豈藉女也嘗以為憂

史臣曰金以高祖撥亂之始翼成王業忠款之至成此

奉和御製讀後周書三首

并注

大功故能終享遐年位高百辟觀其盈滿之戒

見動之幾微者也又贊云赴赴咸陽邦家之暉

思道懷廉慎童年類老成郡豪嘗警服邊寇亦清平臨

難輸忠節辭榮保令名賢哉蹈仁義舉世可為程泉企

道九歲類成人授討寇將軍屢破邊敵為雍州刺史豪

石屏迹忠尚廉慎每除一官憂見顏色至於頻辭史臣

曰企臨難慷慨有人臣之節豈非蹈仁義歟

南荆推德厚千里遠從師奧識通三教清聲冠一時就

招雖暫至戀本固難移故老稱前事儒宗道益滋沈重

招沈重于南荆史臣曰每聞故老稱重所學非止六經故能馳聲海內為一代儒宗

遷哲承華緒深謀事戰征艱危思大節慷慨得群情惠

愛均戎旅威名震敵城江陵摧寇勢宵遁賴奇兵李遷哲少

仕梁襲沌陽侯慷慨善謀畫羣下甚得其情後降周太祖問之對曰世荷梁恩不能死節太祖嘉之拜車騎將軍往畧巴蜀皆望風送款與士卒均食親加醫藥故軍

感之人思效命後陳冠江陵遷哲往救乘闔出兵擊之

陳人乃遁

奉和御製讀隋書三首并注

里仁懷遠度大雅擅嘉名制禮通時變求書贊治平推

心清選舉從儉化黎氓終始承恩遇芳猷冠老成牛里仁為

秘書監請開獻書之路為太常卿定雅樂議新禮為吏部尚書務在審慎推心任委隋之選舉于斯為盛里仁

榮寵當世車服早儉隋室舊臣終始信任一人而已史臣曰里仁懷曠遠之度可謂大雅君子矣

榮定誠嘉器攀鱗屬盛時賞勞思特異知足志惟熙壯

節承招感崇基保燕詒但能思衛霍自可比著龜寶榮定沉

深有器局娶安成長公主少小與高祖相厚後以佐命功拜上柱國遷秦川總管逐虜于高越原無水榮定仰

天大息俄而澍雨帝欲以為公榮定上書云西朝衛霍東都梁鄴寵積驕盈必致傾覆上乃止史臣曰榮定運

屬時來以功懋賞保其祿位貽厥子孫崇基弗墜盛矣

子蓋懷英斷南荒久駐留清通承眷獎恭順望巡游異

寵榮鄉黨丹誠破寇仇邊民思舊愛刻石在西州樊子蓋為

循州總管十年授武威太守煬帝下詔曰子蓋幹局通敏履操清潔又曰宜加褒顯以昭獎勵後帝幸隴川宮

子蓋傾望鑾輿帝下詔曰卿夙懷恭順聞朕西巡欣然望幸是歲朝于江都帝曰富貴不還故鄉衣繡夜行耳

勃廬江郡設三千人會使謁墳墓當時榮之及留守東
都破揚感帝謂曰揚感之反神明故以彰公赤心耳後
武威吏民
刊石頌德

奉和御製讀唐書 三首 并注

天祚文皇德元成雅道施納忠禪關政偃革致昌期宴

喜刀方解人亡鑑遽隳數行遺奏在猶可動神祇 魏徵

成太宗嘗曰微勸朕偃革興文天下大寧又宴日謂侍
臣曰微獻納忠謹古之名臣何以加也解佩刀賜之徵
亡太宗曰朕以三鑑防已今亡一鑑矣遣人就宅得遺
表一紙數行可辨云任善人則國安任惡人則國危公
卿之間時有愛憎所宜詳慎太宗曰侍臣可書之於
笏史臣曰徐邈山濤謝朓比文貞雅道不有遺行乎

哲輔延清問元和致治平從人成庶務求瘼濟羣氓務

遠能無怠求材可倚成乃知虞舜德恭已固難名 元和初杜

黃裳為相憲宗問以前代帝王之事對曰帝王之務宵
旰以求民瘼捨己從人不宜怠肆安逸事有綱領小大
當務知其遠者大者固不可代下司職但擇人委任責
其成效傳補帝舜之德曰天何為哉恭已南面而已

賢哉段忠烈振迹自加寧動必懷剛毅何嘗廢典刑英

規方貫古樂石諒難銘密議初如用艱危豈易形 段秀實初

為安西別將節度梁宰懷異圖秀實直言折之尋為節
寧都虞侯號令嚴一軍府安泰代宗聞而嗟賞之後笏
擊朱泚遇害德宗褒贈甚厚官為立碑初秀實諫以禁
兵少不足以備非常德宗不能用後文宗時宰臣李石
曰自古沒身以衛社稷者無如秀實之賢

奉和御製讀五代梁史 二首 并注

李唐危漢祚巢寇盛黃巾嘉士逢多難忠言變逆倫決

疑歸大順宋策戮姦臣宜享崇高贈千年道更新 唐季之亂

危于漢末巢寇之黨盛于黃巾進士謝朓投迹梁祖說以歸順唐室梁祖曰我意素決又復何疑即日定策戮偽監軍使悉眾歸順信宗授贈太子率更令開平初追贈司徒

贊貞懷武鷲轉鬪歷炎涼誠感泉源異兵嚴士庶康臨

危見忠憤對敵擅威強終始心無改遺言更可傷牛存節字

贊貞武鷲有大節威名聞于敵境戰鬪累載有功初授洛州步軍都指揮使法令嚴整士庶安之為同州節度使岐人迫城城中井水鹹苦人不可飲存節乃肅拜虔祝擇地鑿八十餘井味皆甘淡以為至誠之感病渴且消河北用兵存節忠憤彌篤未嘗病將終戒其子以忠孝不言及他

奉和御製讀五代史後唐史二首并注

燕趙生奇士仇方決志平十年常竭節一劍早知名自取河南鎮終辭霸府兵飛鷹昭慶路窮達有高情符習少事

王鎔鎔為張文禮所害許于莊宗曰臣本趙人王鎔故使常授臣一劍俾臣平蕩兇寇願忠本軍誅其逆黨莊宗令閻寶等助討之誅文禮莊宗割相衛二郡置義寧軍以習為節度習對曰魏博六州見係霸府不宜據有割諫但授臣河南一鎮臣自攻取乃授天平軍節度莊宗十年沿河戰守常以本軍從心無顧望後安重誨不說授太子太師致仕歸故里趙州昭慶縣飛鷹痛飲周遊田里史臣曰符習乃趙之奇士也

長興秉鈞者子晦道攸隆剛介昌言遠忠清茂澤豐懿

文常體道妙略早從戎可惜虧同德當年阻建功李愚字子

晦長興初入相後秦王恣橫權臣避禍不暇無敢言者愚性剛介往往形言人無唱和者不治第宅官借延賓館居之常有疾近臣宣諭延之中堂設席惟荒詰明宗特賜帷帳茵褥嘗為文曰仲尼遇顏子壽等篇人皆稱之初以翰林學士從魏王征蜀安重誨問計皆中後馮道出鎮與劉昫同在中書昫與道婚家或舊事不便要釐草者對論不定由是罷相

奉和御製讀五代晉史二首并注

子文懷妙識奧學洞天常恬淡游蓮幕謙虛踐玉堂至

仁周僕御大雅變詞章慎默誠無怠危機可盡防崔祝字子

文好學博涉經史問居二十年專以著述為事王瓚表為從事性恬淡不及汲于榮利為翰林撰樂章新詞教

舞童歌之高帝嘉之有人借文本寫者則曰有前賢有來者安用此端坐寡言嘗云非止致人受憎或千人之

忌諱指命僕役亦用禮節盛著祁寒不使冒犯

大雅懷忠孝當年效戰征詢謀無敗事臨敵有奇兵安

陸祚狂殄宗城寇難平察廉能惻下何患政難成馬全節字

大雅歷博單郢沂四州刺史在郡有政聲遷全川防禦使會蜀兵攻城出奇拒戰賊乃退後為義武軍節度國

家有所調發朝受命而夕行治生餘財必充貢奉事母王氏至孝温清面告畢盡其禮動與幕客謀議故鮮有

敗事鎮中山日杜威奏括民粟全節曰邊民遇蝗旱家食方困官司復擾之則民不堪命矣我為廉察安忍效

尤百姓稱其德史臣曰全節平安陸之祚預宗城之戰功既茂矣貴亦宜然

奉和御製讀五代漢史二首并注

危邦有賢哲力戰鎮州平草弊還疲庶從寬悅眾情愛

人惟責已徇節幾忘生青史惟馨在千年仰令名王周累歷

郡守安重榮以鎮州叛從杜重威討平之授貝州節度使移鎮涇州前帥張彥澤苛虐部民逃者五千戶周下

車阜前樊逃民後歸遷鎮州節度稟性寬惠人庶便之杜重威引契丹臨城諭之周曰受國重恩不能死戰而

以兵降何面日南行見人主與士大夫乎乃痛飲欲引決家人止之初守信都橋敗覆民租車周曰刺史之過

也乃還所沈粟出私財以修之民庶悅焉史臣曰晉漢之除取符竹者多矣其間有及民之惠如王周之閭政

蓋其優者也

求益誠賢牧庶平致樂康歡謠騰近輔盛典茂徽章舊
相親褒記黎民競感傷豐碑應不朽千載咏惟良劉審交字
求益累任州郡綏撫有術凋弊復蘇為汝州防禦使汝
為近輔號稱難治審交盡去煩弊百姓歌之卒郡人聚
哭乞留葬立碑起祠詔曰褒賢獎善豈限彝章可特贈
太尉吏民所請宜依故相馮道曰知其為人庶平慈善
無害之良吏也吏民懷感如此著痛哭詞六章鐫於碑陰

奉和御製讀五代周史二首并注

文懿艱危際虛心自晏寧依違慙問戰間淡貴無刑鎮
俗懲浮躁尊儒鏤典經忠誠虧美謚良足媿幽靈馮道歷相
四朝難逢艱危不易其度懷才抱業者皆引用履行浮
踪者必抑而鎮之節制同州日閑淡獄布無擾晉祖嘗
以兵事問道對曰神武睿路須從獨斷臣本自書生為
陛下在中書不敢有一毫之失也命學官刊板流布謚

曰文懿史臣日事四朝相六帝可得謂之
忠乎不得謚為文忠文正者蓋謂此矣

文伯懷明識英規世所推濟時陳策畫急用備論思隘

郭爰增廣煩音亦改為溫恭非不濟感遇志如茲王朴字文

伯世宗時言平邊策世宗重其器議世宗以英武自在
有包舉天下之志計事者不喻其志惟朴神氣勁峻惟
剛決有斷几所謀畫動愜世宗之意故急于登庸為端
明殿學士命廣京城靡不由其心匠未幾遷樞密使星
緯聲律畢殫其妙所撰律準並行于世史臣以為太剛
不能濟之以溫恭臣以為朴感世宗之遇急于行事無
所顧望故如斯也

文莊集卷三十二

五言律詩

奉和御製中和節

中春邁初吉嘉節著芳名
習習微和扇欣欣萬物榮
雲融纔化鶴谷暖已遷鶯
朝野多歡且風謠會頌聲

奉和御製會慶殿宴

禁門乘曉會宴宣示慈
伸激水龍騰久儀韶鳳降
頻雲章流漢筑衢酒洽堯
民百辟皆星拱兢兢奉北辰

二月昭州奏正月一日設醮上玉皇表燒錢欠

宋

夏竦

撰

有鶴一隻翱翔久之西北去

平樂初正月虛晨薦號時瑞塲燔碧幣僂驥駐霜儀煙
頂方遙辨星精想下闕天門俄翼去杳靄瑞煙披

野步

顧步方塘上西郊日漸曛歸心臨遠渡晚色在閒雲壠

勢蜂腰接谿流鷺尾分田歌知有意豐美謝明君謹案東行

筆錄云夏竦以父歿王事得三班差使然自少好讀書
工為詩一日攜所業伺宰相李文靖沆退朝拜於馬首
而獻之文靖讀其詩有山勢蜂腰斷溪流燕尾分之句
深愛之終卷皆佳句羽日袖其詩呈真宗及叙死事之
後乞與換文資遂改潤州金壇主簿據此則亦所見乃
野步詩也其改壠勢為山勢改接為斷或東軒筆錄得
於傳聞故有不同耳至屬鶚宋詩紀事但存
山勢二句而不載全詩則以未見竦集故也

秋曉

半庭殘月在江郡鼓聲初秋氣滿南國曉雲高太虛負

霜鴻翼健含霧橘花疎此景無人共朝陽入傲廬

靈溪

剡東溪溜合一派貫天台白鳥蒙灘下青山倚岸迴波

心晴景動渡口晚煙開咫尺通滄海千帆自去來

馬跑泉

天驥何年往龍泓此地存空餘曳練色莫辨裹蹄痕赴

海妨苔甃涵虛礙竹軒會當逢禹鑿始可見鴻源

天台道中

驅馬天台路悠悠漸向晨雲開忽見寺山盡偶逢人細
雨踈篁長微烟古木春行行遙驛道落吹起輕塵案此詩原
本闕今從北宋
人小集增入

石梁

斷澗橫幽石蒼苔古木陰歌危接山腹迢遞過雲心峭
壁峙千仞飛流下萬尋秦人昔驅策蓬島路非深按此詩原
本闕今從北宋
人小集增入

晚望

雨霽吳城晚谿泉四泉流禽歸半峯樹人在夕陽樓國
望分江海星躔次斗牛堪嗟興廢地千載有間愁

鑑湖晚望

新霜脫衰葉寒日下踈篷岸細低疑盡波平闊似空橋
通越谿水帆帶剡川風何處鳴簫鼓叢祠杳靄中

舟行即事

微陽下江樹秋葉泛殘紅鴈背寒塘雨帆爭晚渡風寺
橋人倒影漁徑菊分叢正是承平日輕艘萬派通

吳中懷古

覽古長江上明時起嘆嗟水流吳國苑花入野人家夜
氣銷龍劍秋星見客槎淒涼館娃樹西日映平沙

桐栢觀

鳥道寒藤結洞門蒼蘚深棲臺在山畔松檜出雲心土
暖春長在峯高月易沉羽衣祠太乙香冷石壇陰

此詩原本

缺今從天台
山志增入

喜种隱君授正言直館

鶴版招幽士龍墀襲茜袍道因閒上得名向隱中高密
地棲雲閣清塗歷諫曹終南明月夜松檜自蕭騷

贈海州使君

天衢未得便假道海邊城任大纔勝器官閒不稱名勸
農吟少暇憂物睡常輕見說行春處和風滿旆旌

贈縣宰

俸輕官且冷君喜在親民村路不聞犬縣城長似春架
高書少蠹廳靜隙無塵考滿留碑去清風勵後人

贈逸人

鳳鳥來為瑞達人垂羽翰語因希聖古詩為惜名難泰
華僊標峻江湖酒量寬孤琴有舜曲留我月中彈

送張學士赴闕

東觀嘗聯袂南州各退飛同傾就日戀先喜賜環歸舊
業懷鉛筆晨裝振綵衣離絃有餘思淒切寄南微

送益州同理張殿丞

遠指山川路初辭六尚班占星度危棧叱馭下靈關職

亞銅符重兵銷玉帳閒漢臺誰視草應待長鄉還

送人出牧

聖主念元元良臣選掖垣紫墀分使節紅旆出都門雪
淺斜陽路露深晚燒村暮年如報政應許賀新恩

秋日送人南遊

幾驛蘇臺路輕裝輕塞蓬夜船千擢月寒酒一旗風水
閣菰蒲老山明橘柚紅算君回首處曉色五湖東

秋日送人西上

旅程看驛道西去興何如南國秋霖後斜陽樹影踈野
光飛翠羽溪艷照紅葉好去朝端客人爭草薦書

送人

野色兼行色長亭一送君東書登古路重繭踏寒雲山
過天台小溪臨婺女分流光須強學當宁正崇文

留題友人郊居

羣書架寒壁庶事得從容花木移諸寺雲泉借數峯積
陰春作雨瘦竹老成筇應笑南陽士明朝以卧龍
卜築遠朝市著書成歲功長雲覆孤木古道滿清風地
勝花房異山靈雨氣通綸巾不可戀鶴版下閩東

代村叟

安居近幽谷并賦籍良田聖代無深隱家山不直錢侯

耕看土脉祈穀賽豚肩城市知何處踈鐘隔暮煙

國清寺

穿松渡雙澗宮殿五峯圍小院分寒水高樓半落暉葉

從金地下

寺東北峯有智者金地道場

雲向玉京飛

寺之西洞有玉京天

欲問

西來意誰傳智者衣

善慧師禪齋

是誰名作佛何法謂之禪恍惚起無象逍遙出自然有

修皆障礙欲問即攀緣寄語猊牀客心心不易傳

虎丘僧舍閒望

勝地訪靈蹤層樓四檻風遠陰生曠野午影轉踈桐澗

水霞凝紫谿煙日襯紅可憐秋思晚相倚館娃宮

文莊集卷三十三

宋

夏竦

撰

五言排律

奉和御製瑞雪

朔吹淒寒序繁英降美祥潤將膏露接時契聖心彰不
夜蟾輝滿先春柳絮揚龍沙度北野鷗素失南鄉帝苑
敷瓊藥神池瑩玉塘薰絃俄發詠風雅邁岐昌

宣賜翠芳亭雙頭並蒂牡丹仍入賦詩

華景當凝煦芳叢忽效竒紅房爭並萼細葉競駢枝綵
鳳雙飛穩霞冠對舞歌游蜂時共翥零露或交垂勝賞

回金蹕清香透黼帷兩宮昭瑞德天意豈難知

奉和御製玉清昭應宮天書閣瑞應

盛德靈謀協元符寶字披真宮肇高閣精意感鴻禧曉
箭傳初剌朝陽吐半規祥煙五色麗嘉氣九華滋汎灑
金光溢扶踈玉葉垂堯心膺眷佑欽翼愈孜孜

奉和御製滋福殿清醮聖祖天尊大帝尊像瑞

應

震闡啓瑞場祇畏感穹蒼紫幄威神格清宵景曜彰
霓旌承宇列僊驥度雲翔盼嚳停霞轡歆馨挹鳳觴
千葉固山壽萬齡昌玉籥流宸唱函蒙播美祥

奉和御製天書道陽觀神雀

齋明尊寶籙祇肅建真場上帝靈心顯中宵瑞羽彰
入豐慙美應上雍喜嘉祥彩仗輕留迹彤霞混葆章乍衝
香馥郁高映繚熒煌雲漢敷宸唱繁禧浹萬方

奉和御製冊府元龜子了畢

文德洽隆平蓬山蠹簡盈漢金方盡購秦石諒難程稽
古承先志宣猷聚世英刊修百家備紬繹十年成休沐
當冬日多歡奉相衡豈期頌睿藻何以報茲榮

奉和御製告玉清昭應宮太廟禮成

時巡將順豫吉禮協休成先道真文肅徐變瑞氣平密

都嘉薦備太室令芳呈清越
將金奏齊莊儼翠纓商雲
朝蒼蔚花雪夜縈盈煥衍昭繁祉
千齡表盛明

奉和御製真遊殿成詩

宵晤靈猷顯彤庭藻衛臻鳳輿回
八景龍旆駐三辰太古仙儀接
虛皇密誨伸天枝鴻緒遠殿翼
舊規新寶勢承基壯祥輝燭地
頻叢楹虹帶繞彩制玉霄隣
致孝常尊祖祈禱永庇民
巍巍扃禁內億載奉元真

奉和御製大酺

瘞玉祠真時還衡格闕宮策
勲恩已盛合醪慶彌隆
法坐臨雙起清音奏六同
羽毛秋色麗簪紱曉光融
寵宴

均堯酒宸章起漢風羣生遂
鳧藻何以報層穹

賞花釣魚應制

上苑乘春啓竒花放祉新
連房紅萼並合榦綠枝勻
翦獻尊長樂分頌寵輔臣
從遊過水殿凝蹕近龍津
黼座臨雕檻文竿引翠綸
波香投桂餌萍暖漾金鱗
湛露芳尊酒鈞天廣樂陳
多歡千載遇何以報嚴宸

延福宮雙頭牡丹

禁籞陽和異華叢造化殊
兩宮方共治雙藹故聯跗
嚮日檀心並承煙翠榦
孤游蜂須並翼凝露亦駢
珠曉檻香俱發晴階影對
鋪君王重天貺臨寫冠珍
圖

奉直園雙頭芍藥

奉帝名園麗翻塔淑艷新一叢芳蕊綻四朵絳附聯朱
李應雙結蘭缸忽並燃異瓜緗蒂合嘉木翠枝駢映葉
交霞袂迎風疊綺錢流祥在圖素千載冠嘉蓮

講徹禮記崇政殿開宴應制 賜花內
出口味

幄坐尊儒術華尤御講筵爰開栢梁宴為畢曲臺篇法
從飛綏接藩房綺組聯賜花均綵萼陪昂雜冬鮮甘潤
聲詩洽芳蕤注籍傳師臣咸拜手歸道黼帷前

皇帝聽講尚書徹太清樓錫宴

浴書初寵講漢苑特開筵將許陪旒宸先容閱簡編神

宗遺札啟真祖寶文宣密坐瞻堯日凝心聽舜弦賜花
緗葉綴勸酒玉卮傳恩重天難報肌膚豈易鐫

觀唐明皇山水字流杯石應制

開元留翠列昭代奉宸游綠酒聯杯泛紅泉滿字流澄
清涵玉宇激灑轉銀鈎霄堦奎躔布龜圖洛畫浮偃波
分密坐垂露直前旒若許銘天德園青豈易儔

元真殿燒香觀太宗真宗御書仁宗飛白書并

瑞穀應制

蘭炷薰琳殿霓旌映綠莎九青真蔭遠三母睿慈多閣
道陪鑾往唐中奉詔過熙陵遺札啟禰廟寶文羅繼志

頌宸翰飛毫動偃波史臣書絕瑞鈎看對嘉禾

奉觀御飛白書應制

聖德天攸縱慈闈寶訓崇飛毫邁古法方丈奪神功輕
素飄驚吹長煙疊遠空點孤時戲蝶波偃乍騰虹洛畫
誠難並奎躔或可同猥叨宸筆賜羽翼誓輸忠唐太宗嘗以神
筆賜馬周飛白書曰鸞鳳凌雲必資羽翼肱之寄要在忠良

皇太后恭謝太廟

中書附進

法宮裁舊典長樂奉春祠犧象華搏設旂常大路移屬
車朱總備亞裸翟章垂瑤爵因周制金根益漢儀歌馨
百祿委齋祓六宮隨往訓遵三母何階擬聖時

躬耕藉田詩

廣作承嚴享東廛錯上儀纁裳拂黛耜綵纁映紅縻內
宰登嘉種餘夫列縹陂游場玉趾遠盡隴紺轅遲蔗蓀
訓農穡馨香供帝染匪今方介祉敢續載芟詩

晚晴

萬家充積望千里絕纖埃日輟雲頭上風驅雨脚迴亂
帆爭古渡疎葉下高臺啓戶晴光入卷簾秋氣來山心
餘靄散地角亂煙堆宿鳥幽叢鬧殘虹遠色開脫簑人
顧步矚羽鶴徘徊茵遶枯林下萍翻曲岸隈名園添舊
笋幽石長新苔綺席誰相賀繁絃拍屢催

和集賢相公攝事出郊

台衮承嚴祀傳呼出禁城
圜將錯事總駟暫觀耕
盈止踰周頌康哉叶舜賡
滿箐登大穉首種達初萌
行饁家為黍要明戶捧罌
川長應萬耦樹密盡三荆
有相神休茂多歡國譽榮
餘糧充近甸遺秉富陪京
碓罷舂梁熟機閑織素成
休牛鳴笛起會績遠燈明
路有遺金在村無吠犬驚
熙熙難徧紀徒仰泰階平

送吳興使君郎中分務歸姑蘇

罷郡歸南國分曹在別京
江山適清尚圭組謝浮名
桂楫鄉人送雲漿舊吏迎
夕香薰徑遠春溜飲池平
累去

千憂盡中恬四體輕
吟齋研賜墨釣渚濯塵纓
玉樹時方盛金鈎慶已成
何妨過轂下萬壽集公卿

送鳳茶與記室燕學士詩

綠葍園規異紅滕篆印新
爭先御府首初摘建溪春
膩滑重蒼壁嬌黃聚麴塵
焙痕連井字鳳剗疊龍鱗
玉座均芳旨金華寵侍臣
齋心分一餅持贈朝川人

公能詩善畫臺

閣比之摩詰

文莊集卷三十四

七言律詩

奉和御製千葉黃牡丹

奉聖旨次韻

宋

夏竦

撰

千葉繁英吐異芳
中央瑞色藹清香
密攢鸞羽參差折
細疊霓裳次第黃
霧鎖天衣臨翠幄
露傾金醖滌霞漿
聖明盛事尊長樂
親灑宸毫奉美祥

和御製賞花詩

禁園清蹕賞春時
水殿晴陽照翠綉
步輦乍衝僊杏葉
御衣頻拂露桃枝
風搖藥粉星星墜
日引芳陰寸寸移

帝所甚歡宮漏永宴餘仍奉栢梁詩
禁園奉和御製雪

寒風夜傍梁園積花雪晨臨宋殿飛歌儷陽春爭度曲
月承宵幌競通輝五車洛邑延神御八駿黃臺罷獵圍
今日雲章昭美應眇觀千載事還稀

奉和御製清心殿水清木再連理

禁中遲日照南榮瑞木聯祥耀國經合幹舊臨宮檻密
交柯重接帝梧青華平對植行侵陞若木相輝影滿亭
况是齋心延貺地愈昭天意答惟馨

奉和御製太清樓屏風栢連理

禁園綺合羣芳茂瑞栢屏開秀色呈託植久依僊杏密
附枝俄接帝梧榮非煙結翠和風細滴露凝華曉日明
况是歲寒堅節異亭亭千載表殊禎

四月昌州奏聖祖殿下生芝草一本四莖及面

自何曾有紅光如悅懌之狀

昌元遠地凝和氣真祖僊宮發帝祺穆穆睟容分喜色
煌煌寶座秀靈芝已彰日監靈心顯更表晨敷協氣滋
元后欽崇膺瑞命殊庭薦號答繁禧

五月同州奏牡丹一枝開三花

上聖德風馳率土左馮嘉氣襲鴻英疏叢一幹迎春茂

繁艷三房表瑞呈承獻珍圖昭美應考祥花品見維禎
帝宸欽翼崇昭報薦玉燔柴極至誠

閏六月眉州奏禾生九穗

眉山遠地蜀川西九穗嘉禾忽效祺東極龍枝人莫覩
環丘玉粒世空知中和積粹名方異繁蔚呈祥事更奇
自可增封齊北里豈將同穎比繁禧

八月梓州奏廣化寺池蓮五莖各開二花

梓潼名郡蜀川東忽秀佳蓮紺宇中裏裏修莖孤引綠
盈盈雙葉對分紅絳附相倚凝新露紫葯交垂向晚風
爰考瑞圖觀美應柳州嘉產實難同

奉和御製景靈宮迎牌

紫館成功屬盛時道迎金榜耀文思沉沉殿翼彌增麗
轟轟圭稜盡中規祇薦寶香清吹裏下觀飈御彩雲隨
羣心仰止興誦永見千齡播緝熙

奉和御製兗州景靈宮太極觀牌登路

崇丘紫館集繁禎躬勒璿題耀筆精藻衛森沉登廣路
彩雲搖裏入層城高倂曲密分都號遠法陽寥紀殿名
真祖覽觀鴻慶茂壽山從此倍崢嶸

奉和御製甘雨應祈

少皞九秋當季月成湯六禱動靈心中宵甘澍均豐浸

盡日層雲結遠陰銷去驕陽為瑞重招來嘉應感人深
側身修道殊千古仍叔焉能播德音

奉和御製喜春雨

太液冰銷春水生華林氣暖暮煙橫忽聞甘澍中宵降
共慶豐年上瑞呈拂地如絲籠北闕映花疑霧霽南榮
原田脉起承甘潤自此嘉生永順成

上元應制

魚龍曼衍六街呈金鎖通宵啟玉京冉冉游塵生輦道
遲遲春箭入歌聲寶坊月皎龍燈淡紫館風微鶴唳平
宴罷南端天欲曉迴瞻河漢尚盈盈

此詩原本缺今從詩話總龜采入

帝京春日

景陽鐘盡唱隣鷄十二都門報啟扉一帶樓臺擎落月
萬家桃李待朝輝宮槐煙暖鶯猶睡倦掌雲寒露未晞
算是五侯偏稱意遊春車馬早如飛

江南春日

江北遊人春未迴江南春色傍人來茶經穀雨依稀綠
花接清明次第開場上鬪鷄金作距檻前粧鑑玉為臺
六朝風物今何在莫負流年酒百盃

寒食

夾城煙淡草霏霏晉俗相傳禁火時御苑梨繁花盛發

帝園相嫩葉初披塵微蹴陶人將散雨細鞦韆索半垂
遊騎尋芳還鬪酒九門遙誦樂重熙

六陳風春遊

豔艷春風雨半收少年陳誕稱春遊將軍雪散橋邊市
騎省花開縣外樓草嫩玉堤藏墮珥酒濃金盞滑歌喉
誰能借取瑤池馬亂踏紅塵四百州

初夏有作

玉瑄葭仄昨夜吹日華光暖向陽枝東君亂點丹青筆
真宰忙揮造化椎紅日暗長人不覺好花偷發蝶先知
後園無限桃兼李留待新恩得意時

江城秋思

澤國迢迢枕海涯眼前歸思亂如麻清秋泉石無多地
殘日樓臺有幾家兩岸早霜紅橘柚半汀殘雨老蒹葭
明時不見投簪客落盡西風紫菊花

華山中土

三峯森翠倚雲稜凝睇煙蘿最上層八水亂分秦帝國
四闕空鏤漢皇陵僊羊未起眠春草塞馬初歸放紫藤
堪惜聖朝無傲吏夜來風月屬閒僧

滕王閣

面臨漳水勢凌霞却倚重城十萬家當檻曉雲生鶴嶺

拂塔殘雨下龍沙
辭人高宴文皆在
帝子歡遊事未賒
好是良宵金鼓動
闌干牛斗逼簷斜

江南懷古

六朝雲物更風流
澹澹煙藏古寺樓
敵國漫輕江似帶
史臣能視橘為侯
荒臺有鹿姑蘇晚
壞閣無香建業秋
到了賢明出中土
莫誇歌舞霸南州

金陵

虎踞龍盤委薜蘿
臺城春雨長寒莎
梁家不覺市朝改
蕭寺只聞鐘磬多
雲樹暮堤攢劔戟
風篁虛谷轉笙歌
須知玉氣隨明主
不據金陵又若何

狼山渡口有作

渡口人疎黯翠煙
登臨猶喜夕陽天
殘雲右倚江都樹
遠水南迴建業船
山引亂猿嗥古寺
電驅甘雨過閒田
季鷹死後無歸客
江上鱸魚不直錢

感興

流年難駐且從容
莫厭多情事萬重
深院晚因留客鎖
小欄春為惜花封
家山久駐偷歸夢
庭檜清含入夜鐘
更有薄遊長記得
翠鈿遺處綠陰濃

洛中春早禱龍門無畏塔得雨

露盤金索出危岑
風卷驚塵撲翠林
五夜清場嚴佛事

一犁甘澍慰民心聖君旰食憂應減守吏齋誠禱更深
泛灩洛川皆帝力好浮青鯉瑞煙尋

本宮投龍簡中使

醮罷層霄鶴吹分夜壇香火鏤真文羽人月筆封瑤檢
使者星馳下絳雲藻簡薦誠川后聳金龍傳信洞天聞
再三鵲尾添檀炷為祝虛心佑聖君

僊姬怨

洞口垂楊拂地垂年來期約又依違紅桃不解留人住
白鶴何曾覓信歸雉扇對開春寂寂繡衣雙卷雨霏霏
無言盡日雲邊立不許霓裳接羽衣

宮詞

柳帶分陰接殿基笙歌還擁翠華歸前宮曉赭勻粧臉
別館春紅曬舞衣槐影對籠苔點細桐花西倚夕陽稀
夜來夢上檀香閣猶映珠簾避貴妃

秋日江館喜彈琴羽人至

水館淒清天一涯喜逢僊蓋駐靈芝煙霞初散海中會
風雨忽來江上期琴軫玉寒彈宿露酒卮金暖對朝曦
圮橋書在如相授不獨留侯是帝師

喜馬少保致政

世機無路惱天真心地逍遙萬象新久成金河歸塞客

却浮鯨海到家人靜封藥竈移文火閒看花陰上舞茵
應笑公侯方內熱六街奔走利名塵

送江寧相公

六朝臺榭好山川丞相遙分造化權兩府規模遵故事
二南風什聽新篇平反庶獄棠廬外約束諸侯玉帳前
莫訝依依戀行色壽藩書命最多年相國初拜衛翼之命叨掌除書

送太傅相公居留洛宅

梓澤芝田尊帝里玉符金鑰委台司家傳舊節居連帥
元帥忠懿王昔朕土南陽公復以武勝節制居守繼長諸侯史作新書贊父師留府
橐鞬分騎引都門圭組闕班辭共驚河洛初開輿一日

龍光四海知

上即位作述多秘禁中至是賜公詩一章寵行天下榮之

送濟南杜郎中

秋樹參差墮葉紅剖符還過故鄉東星分北陸龜蛇內
位應哀鳥太紫中亭傳宛如行部日公魯司京東漕輓冠纓猶
帶觸邪風歷臺寒泉豈是無人塞應待君侯立事功

送修撰楊學士留守南京

畫船推鼓忽東浮留幕賓從候舳艫宮裏銅魚勘門鑰
府中銀兔合軍符鳴騶苑路人千騎送客河橋酒百壺
莫為文章還自苦驚池龍岫且遊娛

送王端公克荆湖北路轉運

錦衣驄馬好還家大別山邊漢水斜
霜簡位高增意氣金章恩重有光華
幾程蠻徼雲藏驛一棹荆江月照沙
多少朝簪鬢成雪願君休訪楚山茶

送李殿院知防州

屈草聯芳映法冠亭亭風度聳朝端
一麾出守秦城近千里班春漢詔寬
引道畫旗迎馬重褰帷霜簡照人寒
都門迴首多離緒寶瑟淒風別酒闌

送蘇臺守受代歸朝

香案當衙拜鳳書使君旌節下姑蘇
賓朋唱和詩千首耆幼扶攜酒百壺
野樹遮藏過建業亂山迎送出江都

西風不得同歸去紅藕花邊望舳舻

送新恩善濟處士歸玉笥

蠲疴妙劑分黃閣駐景仙山奉紫闈
太秀山川須長價少微星宿已增輝
幅巾不被塵纓縛別笈唯封賜藥歸
唳鶴鳴猿好相候利名無染世還稀

送人遊閩右

朝曦輕抹柳梢長歌徹郵亭飭去裝
鶉首右瞻秦分野虎牢西入漢關防
溫泉雨霽離宮碧麟時沙鷺寒日黃
如訪平戎最長策不徒鞭馬為詩忙

送人入越

廣陵江口柳疎疎自領笙歌上舳艫一片曉山迎越絕
數程春水背姑蘇蓮供晚果蜂房細繪市朝餐線縷麤
他日功成待相訪謝家煙月借人無

送人之淮西

五里亭前一送君碧油紅旆駐清塵半軒晚日淮西路
數拍離歌江上春杜宇有情移別樹野花無主傍行人
男兒多少疇恩地不欲東風淚滿巾

寄張相公

台司金印護諸侯冲氣均和耐素秋戶牖舊謀方倚重
菟裘前計合遲留豈同少傅輕辭漢况有維師永佐周

秉燭家園且行樂即應重起濟川舟

春日寄陳舍人

濃淡晴霞泛夕陽重重煙藹護流芳花殘遠渡曉風急
路入層雲春夢長結蕙翠光留蝶舞含桃紅實駐鸞嘗
可憐得意文章客扈蹕西園月桂香

題東林寺

昔帝先賢跡未消森沉臺殿鎖嶢峣新蓮照水香空在
舊輦生塵翠已凋夾道古藤看翳日過谿蒼蘚半侵橋
遠公前意無人會空對清風望寂寥

崇勝寺

山當廬阜五峯邊地占侯谿好習禪香藹峰巒雲蔽日
參差樓殿瓦生煙僧房宿鳥棲簾外客館鳴泉過枕前
但可登臨閒訪古西來無法與人傳

觀夜醮

萬條銀燭間靈旗一片清香匝玉墀羽帳星辰來不覺
僊壇冠帔立多時紅挑裊露風初細白鶴迎雲月漸遲
試託東皇問蕭史鳳簫應許借人吹

話道

清淨無營即自由神僊何必待人求秦皇多許死猶諱
漢武窮兵老未休巨費漫悲徐市藥怪書空驗少翁牛

須知方寸真元意不在層城十二樓

赤城

丹壁排空疊綵虹上真應此駐靈蹤烟沉曉日明孤頂
雲破餘霞出半峰巖下法師曾伏虎洞中僊客屢投龍
他年翠蓋東巡狩玉牒終須受大封

案此詩原本闕今據北宋人小集增

入

文莊集卷三十五

七言排律

奉和御製襲圖閣觀書

是日觀太宗御書

切雲層閣倚龍城
霜素緹油聚壁經
嚴名近臣容侍從
載賡宸唱樂清寧
神宗燕翼垂貽訓
地寶昭彰顯瑞形
芬馥芸香飄紫禁
熒煌金刻照彤庭
龜陳洛畫開瑤檢
弦泛薰風出黼高
自慶孤生逢旦暮
媿無嘉頌贊明馨

奉和御製奉祀禮成晏

真塲薦鬯方回蹕
泰時欽柴既受禧
璧散九行頌寵宴

翠綏三接慶昌期露晞朝景彰慈渥風扇微和表聖時
羽籥動容分廣砌旂旂交影上丹墀瓊附拜賜承天意
綵羽來儀識鳳姿向晚栢梁傳睿唱帝臺春箭更遲遲

奉和御製內苑嘉穀

淵聖欽明撫庶氓齋居勵翼御彤庭天田播種勤農事
雲稼流祥耀國經瓊粒蕃滋爭結穰龍枝屈曲競分形
搖風秀色交卿霽垂穎餘光近帝星茂遂豈同蕞葉與
殊尤全掩鳳冠靈連莖五七踰成數實表皇穹鑒德馨

奉和御製玉清昭應宮天書閣上梁

颺馭告期宵寤協紫虛疇德秘符呈誕膺顧謏營恭館

仰悟威神奉太清密石龕磨鳩郢匠非烟騰瑞集周禎
上侔帝闕規模麗遠掩迎年憲度明將閱玉文藏綠蘊
載崇金閣對丹城高陞彩制修梁直永據柔靈寶勢貞
飛陛綠雲彌岌業重欒倚漢益崢嶸良辰涓選繁禧茂
嚴蹕臨觀懿禮成慶賜春流均盛食真香雲涌薦明誠
薰絃濬發斯干詠丕顯鴻猷洽治平

奉和御製玉清昭應宮玉皇大殿上梁

三聖重熙鴻業茂百靈申錫寶符彰寅恭清淨函無象
顧謏高明順秉陽法馭省巡修廢墜真宮經始報祺祥
棟升文杏觚稜峻殿啟真琳玉瑱方九帳盛儀陳宴衍

六莖清奏助歡康
開軒瑞氣凝空碧
駐蹕晴輝艷赭黃
珠樹移陰從帝圃
霓旌分影自仙鄉
宸游悅豫同襄野
睿藻昭回邁栢梁
黎庶縱觀爭嘆詠
侍臣嘉頌極游揚
靈休錫羨淳風振
永播聲名浹四荒

奉和御製國學太宗皇帝御書閣上梁

神宗濬哲通三變
善繼文思洽萬方
高倚叢楹藏鳳縕
密龕溫石鏤雲章
素風暢茂增鴻慶
景耀騰凌發美祥
迴據日畿分寶勢
遠承雲路抗飛梁
推恩宥幣班中帑
式宴朝纓集上庠
更仰紫宸敷睿唱
夏弦春誦永游揚
奉和御製九天司命降臨

緝熙綿寓肅邊疆
蕃祉紛綸顯阜昌
真馭告期通夢寐
嚴宸精意潔壇場
青煙漏上盈中禁
碧輦宵分下彼蒼
照地輝光蒙鶴馭
靄靄人嘉氣雜蕭薌
峒山順拜鴻儀展
太古靈源密命揚
載仰金姿唯睟穆
稍瞻雲躅更輝煌
曉霞微動觚稜峻
弦月斜明玉瑱方
丹鳳卷旗嚴藻衛
綠車旋軫向仙鄉
春祺渙汗均流慶
睿唱昭迴紀降祥
萬國頌聲皆載路
巍巍馨烈邁成康

奉賀御製靈應瑞石

沉潛醜粹生嘉石
宥密開祥契上穹
降聖遠期真馭協
卜年遐祚寶符同
夏殊延喜靈珎上
詎比昭華瑞琯中

隱起玉文非篆隸混成環狀豈磨礱彌彰帝歷休祺茂
永叶仙源統緒隆欽翼春懷敷睿藻巍巍十祀仰惟聰

奉和御製朝元殿謝玉皇大帝

三清右序儲繁祉萬乘欽明荅上穹聖化誕敷書軌混
僊游昭假地天通靈輝熠煜充丹禁瑞霧霏微翳碧空
積累有開鴻緒遠顧懷無際慶基隆精心展彩威顏肅
法曲迎真睿藻融象舞在庭功夙異寶符先道古難同
奉朝嘉服祇羣后贊帝鴻儀儼上公神爵乍臨香馥郁
喬雲低映樹青葱潔粲裡薦升嚴陛蒼壁高蟠照曉風
宣室受釐均大賚洋洋春澤浹區中

奉和御製朝謝玉皇大帝致齋夜天書道場觀

鶴下臨

紫皇齋被感青冥仙驥徊翔瑞氣平百和真香凝玉羽
九枝芳燄動星精遠辭金闕銜靈命俯瞰瑤臺效帝禎
矯翼乍侵龍旆影揚音微雜鳳簫聲應須置祀昭神異
豈止登歌紀聖明藻衛仰觀皆率舞益知天意合三清

奉和御製奉安聖像禮成

琳宮胥宇象清都金閣叢楹闕寶符昭假僊游彰曾緒
範鎔真像極規模精衷欽翼明威顯近輔恭迎茂典敷
美應荐臻書不絕靈期先定日無渝徘徊瑞羽臨旌旆

天矯飛龍上舳舻齋幄接神珪壁異景輿迎聖羽儀殊
熒煌寶座安三境嫗煦鴻恩下九衢深慶小臣叨奉蹕
翠綵華組耀微軀

奉和御製先天節上清宮道場香合內獲金龍
元真降治祐生民紫館空歌協吉辰芬馥鵲鑪蘭注裊
盤縈鈿合翠龍臻陰凝珠樹飛鱗密影拂霓旌瑞角新
月駟雲螭徒駿逸碧鷄金馬謾璘彬會駘蚪輦昭靈異
終接颺輪奉聖神願復水官修泰御紀年何足播芳塵

奉和御製恭謝天地禮成

元真密海惟疇德耀魄靈猷務降衷僊里肇禋尊妙道
國陽嚴配報層穹百神右序儲蕃祉羣后寅威仰聖風
聲震山淵踰日際澤流根葉徧區中考熙茂範登虞舜
積累遙源屬帝鴻柔遠九垓書軌混凝休千載帝天通
賡歌紫禁唐文盛第頌青緗漢德融盛業巍巍心翼翼
古今能事集皇躬

奉和御製真游殿上梁

均和玉燭成冬夕疇聖珍符紀瑞年八景鳳輿臨紫禁
九微龍燄照祥煙森沉藻衛僊游接眸穆真儀聖誨宣
濬發璿源開物始密敷鴻蔭肇基先良金肖像銘三品
寶殿新規度九筵綺棟虹陞初矯爾丹楹叢倚倍森然

高侔帝所威神備迴據坤靈勢勝全雲雀嚮陽明翠羽
玉題承月燦球躔元龜協吉休符茂盛藻迎祥睿志虔
璧散示慈恩正洽斯千流詠降瓊牋

奉和御製與天下臣庶恭上玉皇大帝天帝聖
號

皇皇至德召和平茂烈馨香已告成祇報元符營紫館
欽崇上帝薦鴻名奮威潔志通三境宥密真游降九清
淳耀先期觀道秘休成協吉順天正瓊干文彩雲幡列
金簡熒煌五字呈藻衛導迎揚盛則靈場陟降極精誠
絲區率籲民胥悅篆素鋪觀古未行廣樂乍蕪簫籟響
仙風微動珮環聲颺煙層宙祥輝涌稱慶齋闈瑞氣生
道蔭符通嘉應集中宸繁貺永充盈

奉和御製五岳觀上梁

嶽鎮明神屢降康聖心尊奉禮文揚徽名祇薦昭殊典
祕宇欽崇報美祥曲沼甘泉秋湛湛浮榮嘉氣曉蒼蒼
金釭銜壁流繁影雲雀躡薨耀采章祇核玉靈涓吉日
密巖文店架修梁都人霧集鴻儀盛帝御天臨絜志彰
宸唱茂宣昭峻極春祺紛委顯蕃昌升平更屬西成日
擊壤歡謠徧井疆

奉和御製玉清昭應宮成

中宸夜駐飛廉轡東闕朝迎綠錯篇祇建寶宮朝睟象
載崇金閣奉真銓高侔紫極威神異迴據柔靈勝勢宣
矗矗端平規景叶煌煌豐麗聖功全承隅陽馬層雲隔
鳴磬花臺曉色先別笈錄箴龍印字清壇香奏鵲鑪煙
流泉灌注通河漢列館回環接洞天玉籟琅璈鸞競舞
藥書金簡鶴爭傳采梁虹指祺祥集銀榜星分慶賞延
永鎮帝居資曼壽五城奚取漢迎年

奉和御製會靈觀甘露

岳靈飛觀聳神州上聖欽崇德日休嘉露霄零甘特異
貞條膏被勢何稠崑山寶器今初貯漢苑仙盤昔未浮
自可紀年昭瑞應更殊添海助洪流堇荼變味承餘潤
圖牒騰芳煥大猷願采朝華和美玉仰資宸笑倍千秋

奉和御製冬至

漢門候景嘉辰啟魯觀書雲協氣升玉琯飛灰新節應
璿霄合璧瑞華凝陽芸初動猶兼雪柔荔將芳尚隔冰
繁祉建元名已肇殊庭備物禮將登黃龍甘露誠難擬
泰時甘泉豈足稱共慶帝辰延百福巍巍千載庇黎蒸

奉和御製恭謝南郊

高真降佑開鴻業哲后祈禱福下民靖館齋心成鉅典
嘉壇報貺奉嚴禋時遵夏歷春當孟禮憲周郊日在辛

圖籙先登符命顯祖宗昭配孝思伸侍祠卿士衣纓列
隨兆星辰俎豆陳穆穆蒼靈潛扈蹕寥寥風伯豫清塵
再登午陞虔誠達三燭奔精美應臻萬壽無疆增介祉
永蠲牲玉事神明

奉和御製慶先后升祔禮成

事地有嚴彰至德顯親為重化含生永懷慈景心追孝
載舉鴻儀月就盈徽冊欽崇昭懿鑠太宮祇祔極誠明
黃彛進裸精表達小呂登歌茂禮成式宴外庭均大慶
受釐恭館洽維禎薰弦遠播思齊頌億載垂鴻廓帝紘

文莊集卷三十六

宋夏竦撰

七言絕句

奉和御製藉田詩

紹休文祖盛儀陳載耜東耕協仲春冕服遠推踰古制
須知明主為生民

奉和御製皇太后恭謝太廟

聖慈因心邁古先親裁禮樂定犧牲裸成文母膺鴻祐
永指南山比壽年

奉和御製幸金明池

睿藻昭回俾列緯時龍順豫體蒼旻豈同周穆臨瑤水
凱樂雍容浹庶民

御閣春帖子

金盤曉日融春露黼帳鮮雲蔭瑞香聖壽永同天地久
南山何足比延長

冰消太液生春水日上披香積瑞煙喬嶽告成鴻慶遠
垂衣無事永千年

天人道洽真游降禪祀功高帝業昌迎氣東郊風乍暖
受釐中禁日初長

九門和氣衝魚鑰層宙祥飈起鶴雲玉澤下流慈煦遠

萬方歌舞戴明君

青達布序韶暉盛紫禁象春樂事多海域晏清無夕慮

齋居宣室順天和

寒梅吐艷風初應步輦宣游日漸遲道蔭無涯真緒遠

永康寰海茂春祺

內閣春帖子

青達布序和風扇紫禁延禧瑞日長佇看親蠶臨繭館
永觀彤管播聲芳

椒花獻歲良時啟彩鷺迎春淑氣來仰奉帝慈方秀出
吹簫看築鳳凰臺

東郊候氣迴青輅北闕迎祥闈紫闈大庇羣生承寶緒
永敷春澤播鴻徽
銀箭初傳暖律延微和漸扇物華妍彩幡紅樓宜春字
永奉宸慈億萬年
青陽乍整蒼龍駕紫宙初凝白鶴雲曼壽無疆真蔭遠
九重嘉氣日氤氳
緹室葭灰飛候管彤闈天路起和風六宮永被河洲化
穆穆芳猷佐聖功
三星分曜輝宸漢九禁迎春啟合辰仰奉椒闈宣內治
湛恩鴻慶永如春

壽春郡王閣春帖子

穆穆韶華生紫禁遲遲春箭下青宮良辰已慶加元服
大國爰聞拜景風
緹室葭灰飛律管鳳闈春色動年芳仙源積慶誠無際
永戴宸慈襲美祥

日上苑梅疑素艷雪晴宮柳弄青條已觀壽土封東國
即者懷金奉內朝
異表英奇非世出惠心通敏盡生知更當淑景承慈煦
永奉嘉祥茂本枝

續命彩絲登蘭館長生金籙獻琳宮百靈拱衛天居峻
萬國歡康帝業隆

金縷開辰分五色長絲獻壽祝千年垂衣日月永嘉慶
真祖颺游正在天

僊園采藥回彫輦禁殿迎祥啟鳳闈四海樂康民富壽
穆清無事永垂衣

彩絲祝壽芳辰啟紫禁凝旒瑞日長億兆歸仁天祐德
綿綿真蔭永無疆

絳臺丹筆書金籙紫殿瑤箱獻巧衣億載延鴻資睿算
百祥重沓擁宸闈

太官角黍迎嘉節上聖齋居襲美祥金闕鑒觀真緒遠
永延鴻慶庇多方

尚方綬帶迎嘉節中禁彤闈納美祥疇德珍符方瑞聖
後天宸壽永無疆

太官角黍初晨啟法坐垂衣介福隆億載昌期方赫奕
九天真蔭永延鴻

賜羨佳事傳青簡續壽長絲獻紫宸帝祉薦彰符盛德
聖心勤恤為生民

五色綵絲初獻壽九重嘉氣頌長生死氏精意方虔輦

垂拱仁風更穆清

浴蘭襲祉良辰啟握紀無為聖道尊為爽嘉祥充九禁
冲融和氣徧千門
八龍焜燿長生錄五米歲筵續命絲億載延長資睿算
萬區康樂遇昌期

皇后閣端午帖子

迎祥競獻雙條連續壽初纏五色絲共仰齋莊陰內訓
永觀蕃衍茂仙枝

璧沼水嬉飛隼渡瑤箱命縷彩絲新親蠶禮畢無餘事
夙佩珩璜奉紫宸

千門朱索迎嘉祉九禁椒塗納美祥虔奉黼帷承渥惠

慶隆襟石美祥新

千門襲吉縈朱索九禁開晨闈紫闈宮漏正長天曠重

永宣芳訓率三妃

日記采蘭追楚俗化享流荇誦周詩肅恭懿德垂彤管

九御歸相心百福宜

中閨正肅鳴環節吉日爰逢采木時億載繁禧同聖壽

百男鴻慶茂仙枝

點畫諸宮初獻巧裁縫中禁又迎祥周南永播河洲化
仰佐鴻明燭萬方

郡王閣端午帖子

對日惠心時共仰
冰蘭佳節慶長絲
仰承中緒隆天愛
永奉祥祺襲太熙

彤闈永奉千年慶
金策將封一字玉
佇向景風承異渥
預從佳節納多祥

五色彩絲頒禁殿
千齡嘉慶集藩房
玉堂絃誦依真館
日日靈心降美祥

崑山瑞玉題真篆
闈苑蟠桃刻印文
並獻春闈延美慶
億年嘉氣永氤氳

淑妃閣端午帖子

誕賓布序逢良月
條達延祥記令辰
仰奉椒塗宣內治

永昭芳譽冠虞嬪

芳園踏草迎嘉節
紫掖鳴環奉鞠衣
渥惠日新鴻遠慶

永隆徽序耀層闈

萬寓清和當聖日
千門採撷邁良辰
上真鴻緒宜蕃衍

從此高褱美應新

宴寢奉朝鳴采玉
良辰襲慶表長絲
仰承中壺垂芳裕

永播周南遠下詩

廷試

殿上衮衣明日月
硯中旗影動龍蛇
縱橫禮樂三千字
獨對丹墀日未斜

和太師相公秋興十首

原上西風馬力生，折膠時候正淒清。
功名未立頭空白，却憶金徽萬里行。

亭臯危葉乍經霜，過盡驚鴻落吹長。
閒上層樓待初月，方壺殘漏下三商。

螢光照水星星度，鴈陣橫空字字移。
何處佳人惜團扇，玉堦烟葉動輕颺。

苑樹殘蟬送遠愁，懶將衰鬢照清流。
歸來自掃東園葉，學灌寒蔬備晚秋。

水榭涼生暑氣銷，疎螢點點漏迢迢。
明河案戶蒼龍轉，

只有匏瓜綴碧霄。

沉沉池閣乍涼天，坐愛蓮薰夜不眠。
却憶北門曾便對，

半簾斜月玉堂前。

相府新秋晏席開，西湖珠履踐蒼苔。
白頭舊吏方奔走，不得抽毫逐上才。

遙思漢闕雨新晴，天際微雲夕吹生。
沆瀣氣涼僊掌迴，滿盤宵露結珠英。

河漢西傾火漸流，露華微冷透輕裘。
何當弄鳳隨驚吹，直上層城十二樓。

彤管少文堪約史，霜戈無藝可防邊。
孟諸蒼莽平臺遠，

坐對秋光又一年

青州

日上西山舞鸞鶴波翻碧海關蛟龍直鉤到了成何事

消得君王四履封此詩見東軒筆錄以為王沂公曾當國鄭公為翰林學士欲撼之而作原

本缺今采入

江州琵琶亭

年光過眼如車轂職事羈人似馬銜若遇琵琶應大笑

何須涕泣滿青衫此詩原本缺今從中山詩話采入

狎鷗亭詩

元化平分荷大鈞左符新刻玉為麟南湖特地栽桃李

擬伴沙鷗過十春

海鴈橋邊綠水深絕無塵土近花陰忘機不管人知否

自有溪鷗信此心

書懷

黃閣有賢圖國計皂囊無黨害邊功河湟飲馬無難事

一點沙塵在目中

到任後作

功兼文武帝師臣久厭崇高樂退身任是東山無限好

謝公爭忍負生民

西廳

階除盡日微風度簾幙先秋暑氣還莫訝使君臨衆久
雨晴端正見南山

宮詞

鬢攏春煙濕翠翹石榴裙慢裊纖腰絳脣不敢深深注
却怕香脂污玉簫
新染羅衣窄地紅喜迎天仗宴春風歌詞若入君王聽
不惜新聲教六宮

古意

重上青樓拂蛛網却勾愁黛對菱波也知新舊爭多少
敢話機頭織素多

漁者

讀徧龍韜事可知一竿閑把直鉤垂秋來江上西風急
且繫扁舟卷釣絲

觀藏珠

敏手機心頗自安遮藏有路巧千般主公當面無因見

只怕旁人冷眼看

此詩出宋文鑑原本缺今補入案

齊宮冷人有雜手技號藏掖者在焉丁顧夏曰古無咏
藏掖詩內翰可作一首即席獻詩云舞拂跳珠復吐丸
庶藏巧技百千般主公端坐無由見卻被傍人冷眼看
東軒筆錄載此事又易藏掖為弄盤注皆與文鑑小異

故附錄焉

安撫狀元內翰還朝復命再獲侯迎先附短章

以代

兩朝西掖舊詞臣
藥苦冰寒四十春
霜雪滿頭塵滿袖
自慙重見玉堂人

送張逸人二首

上公詩筆千金重
逋客歸裝一棹輕
莫向青山更招隱
且留賢哲濟蒼生

徘徊獨鶴翻清景
容曳孤雲下絳霄
朝市山林本無異
前賢出處盡逍遙

到任涇州寄長安府學諸先輩
牛載秦川令始行
論文猶未歎羣英
橫戈且趨從軍樂

不及期年待政成

聞勸農二使渡江訪胡丞相隱居

宅臨殷羨投書渚
門擁維摩問疾人
詔使艤舟應訪道

雨花交影隔西津

咏鳳

千仞翱翔覽德輝
成湯解網四靈歸
梧桐欲下還驚去
悄悄飢鷹掠樹飛

聞鶯

春光容與曉風高
花映金塗見羽毛
莫訝綠楊留不住
內園新雨熟含桃

咏鷹

獲自野羅知性巧飼之鮮食已恩豐下韉未便隨人意
須是經春更一籠

再從西都詠青雀寄張昇諫院

弱羽傷弓尚未完孤飛誰敢擬鴛鸞明珠自有千金價

莫為遊人作彈丸

此詩原本缺今後古今詩話采入又案魏泰東軒筆錄載此詩傷弓作輕

弦尚作勢誰敢作殊不明珠作黃金千金價作雙又南貴為作與其文小異附識於此

廐馬

萬里無塵塞草秋五輪金軛未巡遊上林首宿天池水
飽食長鳴可自羞

薔薇

紅房深淺翠條低滿架清香敵麝臍攀折若無花底刺
豈教桃李獨成蹊

搯行

廣廈長廊四面圍小攔霜雪兩三枝簾帷壅蔽無人見
賴有中天日照知

花檻

夢中作

曲檻橫欄百寶裝春風容冶看人狂孤松瘦栢無顏色
只有青青待雪霜

題華嚴經詩

黼幄思賢已再三詔書將折紫泥緘嘉言一句利天下
何必金文更徹函

寄傳法二大知并簡譯席諸大士

譯案多年潤法音性根雖鈍信根深無明不起冤親等
應有龍天證此心

潤色金文數十函情涼甘露洗塵凡修行不作伊蘭計
只願三千盡寶嚴

雪後贈雪苑師

雪山修道六年成雲滿長空雪滿庭便向箇中登覺地
何須臘月待明星

玉界瓊田萬頃平一年光景一番新苑中又見梅花發
信手拈來總是春

千嶂崔嵬雪裏看東風一夜捲餘寒巖前溜玉知多少
漲起西江十八灘

老去方知行路難此心正要覓人安室中半偈如間得
便作當年立雪看

偶成

非才編歷清華地悟佛方為止足身浮名浮利莫相試
三千世界一微塵
保庇孤根逢聖主於修晚節順天機空門自有清涼地

不向紅塵議是非

燕雀紛紛出亂麻漢江兩岸使君家訟庭永日無留事

一任啁啾到日斜按詩話胡旦秋監性福躁居襄陽夏

舊眼公公出鎮襄陽一造焉謂公曰讀書乎日郡事少暇比只作得燕雀一詩因為誦之胡自是少戢

詩餘

喜遷鶯

霞散綺月沉鉤簾捲未央樓夜涼河漢截天流宮闕鏤

新秋 瑤塔樹金莖露鳳髓香和雲霧三千珠翠擁宸

游水殿按梁州秋上夕宴後庭酒酣處命中使詣公索

立進此詞上大悅此詞大典本關今補入又樹字雜記

原本闕以避英宗嫌名也合據文義增入

五十二卷末二葉互換並此脫葉

乾隆辛丑春三月二十三日丁孝廉燕小山自都中抄貽夏四月十三日
緝適得會試題名錄知小山與戚翰芳學標兄同中進士



